


Mii dáppe

Servodatmáhttu & Geografiija

1
5.-7. cehKíde

Heidi Guttorm Einarsen • Svein Nordsletta



ČálliidLágádus

ČálliidLágádus – ForfatternesForlag – Authors’Publisher
Pb 140, NO-9735 Kárášjohka – Karasjok
Fanasgieddi, NO-9845 Deatnu – Tana

poasta@calliidlagadus.org
post@forfatternesforlag.org
post@authorspublisher.org

Neahntagirjegávpi – Nettbokhandel – www Book Store
www.calliidlagadus.org

ČálliidLágádusa doaimmahusgoddi
Harald Gaski, *mag.art., 1. amanuensa*
Aage Solbakk, *cand.philol., historikhár*
Vuokko Hirvonen, *phil.dr., professor*
Lena Kappfjell, *cand.philol., dutkanassisteanta*
Torkel Rasmussen, *dr.philos., journalistihka lektor*
Mikael Svонni, *phil.dr., professor*
John T. Solbakk, *cand.philol., dokumentarista*

Dán almmuhusa bargguid suodjalit vuognaduodjelága njuolggadusat.
Almmuheaddji ja vuogatvuodaoamasteaddjiid sierra lobi haga ii oaččo dán
buktaga márget dahje geavahit viidát go maid láhka suovvá.

Sámediggi Norggas lea juolludan doarjaga almmuhit girjji.

(©) Čállit ja ČálliidLágádus 2014
Ovdasiiddu govva: Scanpix, Arash A Nejad, kárta: Mihkku Solbakk
Maŋŋesiiddu govva: Studio Borga
Gráfalaš bargu: Studio Borga, Ohcejohka
Deaddilan Waasa Graphics Oy, Vaasa
ISBN 978-82-8263-163-1

Heidi Guttorm Einarsen • Svein Nordsletta

Mii dáppé

Servodatmáhttu & Geografiija

1

5.-7. cehkiide

ČálliidLágádus

Sisdoallu

Servodatmáhttu	7
1. Mii lea servodat?	9
Dán oasis oahpat	9
Mii lea servodat?	10
Mo šadde servodagat?	11
Iešguđetlágan servodagat	12
Čoahkkáigeassu	14
Bargobihtát	15
2. Servodaga rollat	17
Dán oasis oahpat	17
Servodaga rollat	18
Ruoktu, bearasha ja sohka – unna servodagaš	20
Bearraša rollat	22
Lagašservodat	25
Čoahkkáigeassu	30
Bargobihtát	31
3. Stuorraservodat	33
Dán oasis oahpat	33
Mii lea stuorraservodat?	34
Stuorraservodaga doaimmat	36
Suodjalus	36
Doabbariid meannudit	39
Dearvvašvuodabálvalus	41
Dulkonbálvalus	45
IT	45
Skuvlaservodat	46
Riiddut ja givssideapmi servodagas	49
Čoahkkáigeassu	54
Bargobihtát	55
4. Neahttaservodagat	57
Dán oasis oahpat	57
Mii lea neahttaservodat?	58
Mánáid neahhta-njuolggadusat	61
Čoahkkáigeassu	64
Bargobihtát	65

Geografiija	66		
Dán oasis oahpat	66	3. Norgga fylkkat	108
Geografiija – čilget eatnama	69	Dán oasis oahpat	109
1. Mo min eatnamat šadde	70	Norgga fylkkat	110
Dán oasis oahpat	71	Bargobihtát	113
Eana loktanii	73	Finnmárku –	
Mo jiehkki bargá	74	Norgga stuorámus fylka	114
Jiehki viidodat	75	Romssa fylka – nubbin davimus	118
Jiehki mearkkat luonddus	77	Nordlánda – guhkimus ja seakkimus	120
Čoahkkáigeassu	80	Davvi-Trøndelága – stuorra vuovddit	122
Bargobihtát	81	Lulli-Trøndelága – láiréeatnamat	124
2. Kártaoahppa	83	Møre ja Romsdal –	
Dán oasis oahpat	83	fanas ja viessogálvu	126
Kárta	84	Sogn ja Fjordane – várít ja vuonat	128
Geografalaš hámit	90	Hordalánda – gasku Oarje-Norgga	130
Almmihálttit	98	Rogalánda – olju ja mielki	132
Globus	100	Vest-Agder – Lulimus-Norgga	134
Atlas	101	Aust-Agder – geasseturisttat	136
Digitála kárttat	104	Telemárku – dáppe leat buot	138
Čoahkkáigeassu	106	Vestfold – hávdečorut	140
Bargobihtát	107	Buskerud – silbaruvkket	142
		Opplánda – guovdu Lulli-Norgga	144
		Hedmárku – šuvvi vuovddit	146
		Akershus – Gardermoen	148
		Østfold – válodgeaidnu Ruttii	150
		Oslo – Norgga oaivegávpot	152



Servodatmáhttu

Mii fertet oahppat guhtet guimmiineamet. Mii han oain-nat buohkat leat ovttas dán máilmnis. Mii fertet oahppat guhtet guimmiineamet ja veahkehit guhtet guimmiideamet. Jos mii eat oahpa guhtet guimmiineamet eat ge veahket guhtet guimmiideamet, de leat dubmejuvvon.

Čurges Goaskin – Grey Eagle – Ken Jackson. Davvi Amerihká álgoálbmogiidda gullevaš.

Servodatmáhttu lea máhttu dan servodaga birra gos mii eallit. Servodatmáhttu lea dieđut olbmuid birra ja mo mii galgat láhčit dili nu ahte sáhttít orrut ja ássat singuin ovttas. Mii leat buohkat miellahtut iešguđet servodagain. Danne lea dehálaš ahte mii háhkät diedžuid daid birra. Dalle mii fertet digaštallat ollu earáiguin. Mii dárbbašit ságastit ja gullat earáid oaiviliid servodaga áššiid birra. Dalle mii sáhttít árvvoštallat mii lea buoremus, ja hárjehallat iežamet oaiviliid buktit ovdan.

Servodatmáhttu lea eambbo go máhttit ja diehtit. Servodatmáhttu lea maiddái

- beroštit. Mii galgat beroštit alddámét, go mii leat árvvolaččat, muhto maiddái galgat beroštit ja váldit vuhtii earáid geaiguin mii eallit ovttas, go sii leat maid árvvolaččat. Buohkain lea ovddasvástádus geahččat bearrái ahte sii geaiguin mii ovttas eallit, doydet oadjebasvuodja ja buorrevuođa.
- Dán oasis beasat lohkät ja oahppat dan birra mii servodat lea, mo servodagat šadde ja makkár rollat mis leat servodagas.

1. Mii lea servodat?

Dán oasis oahpat

- Mii servodat lea
- Mo servodagat šadde
- Dábáleamos servodagaid birra
- Ohcat dieđuid eará gálduin ja daid vuođul čállit servodatlaš teavstta dološ sámi siida-servodaga birra
- Árvvoštallat ja digaštallat mo amas álbmogat ellet








Mii lea servodat?

Servodat lea olmmošjoavku geat áasset seamma guovllus, ja sis leat muhtin oktasašvuodat mat čatnet sin oktii. Dat sáhttá leat giella, dábit dahje riikkarádji. Sis leat iešguđet doaimmat mat leat ávkin servodahkii. Sii dovdet gullevašvuoda, ja dat fas buktá oadjebasvuodadovdu olbmuide. Mis leat dalle ustibat geaiguin mii sáhttit **háleštit** ja gula-hallat go lea dárbu. Mii dovdat ahte mii ilosmuvvat ja sáhttit reaškit ja suohtastallat. Sáhttit maid jeđđet ja veahkehit guđet guoimmi go dasa lea dárbu. Servodat lea ávk-kálaš buot miellahtuide. Dat sáhttá veahkehit čoavdit áššiid maid mii eat okto nagot. Muhtimin fárrejít olbmot eret servodagas ja ođđa, amas olbmot bohtet sadjái. Dat dahká ahte servodat rievdá. Servodatrievdan lea áibbas lunddolaš. Olmmošlaš **oktasašvuoda** mii bistá guhká, mii gohčodit namain: *Servodat.*

• **háleštit** humadit
• **oktasašvuoda**
ovttastallan, oktii-gullevašvuoda dovdu

Mo šadde servodagat?

Álggu rájes leat olbmot čoahkkanan dan dihte go sii fertejedje ovttas bargat go galge bivdit stuorra meahcceelliid dahje mearraelliid. Dáinna lágiin sii birgejedje. Dađistaga sii ásaiduvve seammá báikái ja ásse ovttas nu guhká ahte šattai servodat. Servodagas sii barge dan maid sii dovde ahte sii máhtte ja sáhtte. Šattai oktasašvuhta sin gaskkas geat ledje gávnadan. Oktasašvuhta mearkkaša ahte sii dovde gullevašvuoda muhtin jovkui. Muhtin olbmot guđđe joavkku ja manne eará báikkiide, ja ođđa olbmot bohte ja ásaiduvve jovkui. Joavku earáhuvai ja rievddai, muhto dan oktasašvuhta bisttii. Servodagat šadde go olbmot ásaiduvve ja bargagohte ovttas čoavdit stuorra barguid maid olmmoš okto ii sáhttán.



Dološ sámi siiddas fertejedje olbmot
bargat ovttas vai birgejedje.

Iešguđetlágan servodagat

Bearaš, ruoktu ja sohka leat min laga-mus ja unnimus servodat. Bearašlahtuid mii dovdat buoremusat, ja sii leat min lagamuččat.

Lagašservodat lea dat báiki dahje guovlu gos don ja du bearaš ássá ja doaibmá beaivválaččat. Lagašservodaga miel-lahtut leat buohkat geat ásset seammá báikegottis dahje **gielddas** go don.

.....
gielddas suohkanis

Stuorraservodat lea Norga ja Sápmi. Buohkat geat ásset Norggas ja Sámis, leat stuorraservodaga miellahtut go sii ásset ovttas seammá guovllus ja riikkas. Máilmiservodat lea stuorámus servodat. Buot máilmimi álbmogat leat máilmiservodaga miellahtut, go mii buohkat ássat seammá eanaspáppas. Sii gulahallet ja barget ovttas čoavdit áššiid mat gusket olles máilbmái. Dakkár ášshit sáhttet leat luonddugáhtten ja olmmoš-vuoigatvuodat.



Lagašservodat

Stuorraservodat



Máilmiservodat

Lagašservodat



f

Neahttaservodagat

Neahttaservodagat doibmet interneah-tas. Dat leat šaddan dađe mielde go IT (diehtojuohkin-teknologija) ja **inter-neahttafierpmádagat** leat buoriduvvon, ovdánan ja **leavvan**. Gávdnojit mánga iešguđetlágan neahttaservodaga. Face-book, Twitter ja bloggen leat muhtin neahttaservodagat. Neahttaservodagaid

- bokte olbmot miehtá máilmxi sáhttet gulahallat, digaštallat ja ságastit.
-
- **interneahttafierpmádagat** buot oktavuo-đain leat čanastagat oktii, dego fierbmi
- **leavvan** viidánan, sturron

Čoahkkáigeassu

Mii lea servodat?

Servodat lea go olmmoš-joavku dovdá ahte sis lea oktasašvuhta man nu láhkai. Dat sáhttá leat ahte sii ásset seammá guovllus dahje riikkas. Dat boktá oktiigullevašvuodadovddu ja oadjebasvuodadovddu.

Mo šadde servodagat?

Servodagat šadde go olbmot ovttas bivdigohte stuorra meahcceelliid ja mearra-elliid. Sii fertejedje bargat ovttas vai birgejit. Dađistaga sii ásaiduvve oktii ja ovddid-dedje oktasašvuodadovddu ja sierra dábiid.



Iešgudetlágan servodagat

Bearaš ja sohka, lagašservodat, stuorraservodat, máilm-miservodat, neahttaservodagat leat servodagat gos mii eallit ja doaibmat. Bearaš ja ruoktu leat min lagamuččat. Lagašservodat doaibmá doppe gos don ásat. Stuorraservo-dat lea olles riika dahje viiddis guovlu. Máilmmiservodaga lahtut leat buot máilmimi álbmogat. Neahttaservodagat doib-met interneahtas.

Ohcci

Loga čoahkkáigeasu s. 14 ja vástít

1. Mii lea servodat?
2. Mo šadde servodagat?
3. Namut golbma iešguđetlágan servodaga!

Dahkki

1. Jurddaš jos don sáhtášit hábmet ja dahkat du niehko-servodaga. Smiehta, pláne, čále ja muital mo du niehko-servodagas livččii eallit.
2. Lohkhet guovllu áviissaid ja riikkaáviissaid ovta beaivve. Sirrejehket áššiid mat mean-nudit lagašservodaga ja áššiid mat gusket stuorraservodahkii.
3. Jearahala muhtun vuoras olbmo dan birra mo skuvla lei dan áigge go son lei mánná. Deavdde bálddastahttindiagrám̊mii seammalágánvuodáid ja erohusaid otná ja dalá skuvladilis.

Dutki

1. Dološ sámiin lei siida-servodat. Oza dieđuid eará girjiin ja gálduin, ja gávnnat mo siida-servodagat doibme. Čále oanehis čállosa dan birra.
2. Joavkobargu. Válljejehket girjiid ja teavst-taid mat muitalit álbmogiid birra mat ellet, dahje bohtet eará guovlluin máilmmiss. Ságastehket dan birra mo sii ellet, jurddašit ja vásihit dáhpáhusaid.



2. Servodaga rollat

Dán oasis oahpat

- Mii servodatrolla lea
- Sohkabeallerollaid birra
- Mii bearas ja sohka lea
- Makkár rollat bearrašis ja sogas leat
- Mii lagašservodat lea



Ustibat.

Servodaga rollat

Mii diehtit ahte **teáhterneavttáris** leat mánga rolla. Muhtimin son lea **gánda**, eará háve son lea politiija ja fas eará háve son lea eadni. Seammá láhkai lea dus maid. Dus leat mánga rolla servodagas. Dál don várra leat oahppi, muhsto ruovttus don leat mánná dahje gán-da dahje nieida. Eará háve leat skihpár, mánáidmánná dahje neahpi.

Muhtin rollaid eat sáhte ieža válljet. Daidda leat mii riegádan. Dat leat sohkabeallerolla ja čearddalaš rolla. Don riegádat gádan dahje nieidan ja sápmelažjan, suopmelažjan dahje arábiaalažjan.

Eará rollaid mii guođđit ja muhtin rollaid oažžut dađistaga go stuorrut. Dál don leat ain mánná, muhsto muhtin jagiid geahčen leat nuorra.

Muhtin rollaid válljet ieža. Rávisolb-muid rolla lea dávjá dan mielde mak-kár virgi dahje bargu sis lea. Snihkkár, badjeolmmoš, duojár ja buvdabargi leat dákkár rollat. Go eai leat barggus dahje doaimmas, de leat sis eará rollat. Eadni sáhttá leat barggus direkteran, muhto friddjaáiggis son lea eadni, eamit dahje **elošteaddji**, skihpár dahje govvejeaddji. Servodatrollat leat olbmuid doaimmat servodagas.

teáhterneavttáris olmmoš gií čajáhallá/ neaktá muhtin rolla teáhteris

gánda bárdni

elošteaddji geainna son ássá ovttas, dahje sudnos leat mánát ovttas

Govvejeaddji.

Nieiddat ja gánddat

Servodagas leat guokte sohkabeali, nissonbealli ja **almmái-bealli**. Servodagas ollugat vurdet ahte mii doaibmat dan mielde mii lea leamaš ja lea ain dábálaš sohkabeallái. Muhtin áššiid servodagas doaimmahit dábálaččat nissonat ja muhtin áššiid servodagas doaimmahit dábálaččat albmát dahje dievddut. Dán mii gohčodit namain: *sohkabealle-rollat*.

Muhtimat válljejit dahkat eará go dan maid servodat vuordá sohkabeallerollas. Lea buorre servodahkii ahte mii geahčalit doaimmahit áššiid mat eai leat dábálaččat sohkabeallái. Dalle leat mii mielde rievdaamen servoda-ga danne go muhtin doaimmaid ja bargguid sáhttet guktot sohkabealit bargat.

gánddat bártnit

almmái-bealli dievdo-bealli



Nisu bargá mekanihkkárin.

Ruoktu, bearaš ja sohka – unna servodagaš

Buot olbmot gullet muhtin bearrašii ja sohkii. Dat lea unnimus, muhto okta daid dehálamosiin servodagain. Muhtin bearrašiiin leat ollu bearashahtut, ja earáin soitet dušše guovttis. Bearašlahtut leat vuosttas olbmot geaiguin mii oahpásmuvvat ja geaiguin mii gallat eallit ovttas. Mii leat áibbas unnit ja dárbbasit veahki juohke dingii go leat addo riegádan bearrašii. Mii dárbbasit

ahte muhtin dikšu, biebmá ja ráhkista min. Soga ja bearraša bokte mii oahppat giela, mo earáiguin eallit ovttas ja servodaga njuolggadusaid. Soga ja bearraša olbmuin leat mánga dehálaš doaimma, dain leat iešguđet rollat. Muhtin bearrašat barget **luondduealáhusain**, ja dalle dávjá šaddet bearashrollat dan mielde maid barget ealáhusas. Dade mielde go mii stuorrut, de bearaš ja sohka vuordá ahte mii veahkehit ja váldit ovdasvás-tádusa ruovttudoalus ja ealáhusas.



luondduealáhusain luonddubarggus, omd boazodoalus dahje guolásteamis

Bearaš sámis dolin. Eadni, áhčči ja mánná.



Ollu bearrašat barget luondduealáhusain. Doppe fertejit
buohkat oassálastit ja doaibmat iežas rollas.

*Makkár lea ruohtas
dakkárin šaddá giera*

Bearraša rollat

Mánáid rolla

Du rolla bearraśis lea mánná, nieida dahje gánda/bárdni, áhkut/ádjot, muottal, siessal, neahpi dahje **oarpmealli**/vil-bealli, oabbá dahje viellja. Mánáid rolla lea dohkkehít ahte **rávisolbmot** mearridit ja bajásgesset du. Dađe mielde go stuorut, galggat don leat mielde mearrideamen áššiid mat gusket dutnje. Servodat vuordá ahte don leat dál nu stuoris dahje boaris ahte don máhtát dábálaš **olmmošvieruid** ja ahte don máhtát láhttet dohkálaččat servodagas.

oarpmealli oambealli
rávisolbmot olles-olbmot
olmmošvieruid olbmuid láhtten-njuolgadusaid



Mánáid rolla lea dohkkehít ahte rávisolbmot stivrejít ja nevvot.



Eadni, gánda/lunta ja áhči.

.....

ovttasráđiid ovttas, digaštallat mo
návcçaid attáldagaid
illástuvvot huškojuvvot, cábmot dahje
eará láhkai fuonášuvvot/dulbmojuvvot
ovddasmorraša veahki, dovddu ahte
sus beroštit

Váhnenrolla

Váhnemiin lea váhnenrolla. Sudnos lea stuorra ovddasvástádus ja dehálaš rolla servodagas. Soai mearrideaba du badjel dassá go deavddát 18 jagi. Dat ii mearkkaš ahte soai sáhttiba dahkanat dan maid hállideaba. Soai galgaba **ovttasráđiid** mánáid bajásgeassit. Dat mearkkaša ahte soai sáhttiba mearridit maid mánná galgá bargat ja maid ii oaččo bargat. Ovdamearkka dihte sáhttiba mearridit goas mánná galgá boahtit ruoktot dahje man ollu ruđa son oažžu lobi geavahit. Soai galgaba maid geahčat bearrái ahte mánát ožžot oahpu **návcçaid** mielde. Mánná ii oaččo **illástuvvot**, fuonášuvvot dahje vuortnuhuvvot. Mánná galgá oažžut **ovddasmorraša** ja divššu. Váhnemati galget mearridit du ovddas. Dađe mielde go storrot, galget mánát leat mielde mearrideamen áššiid mat gusket sidjiiđe. Servodat vuordá ahte váhnemati dovdet iežaset rolla ja válđet ovddasvástádusa bajásgeassimis.

*Ii guhtegē riegát ákšu
gieđas*

Eará rávisolbmo rollat

Mánát dárbašit deaivvadit iešguđet-lágan olbmuiguin dađistaga go sturrot. Áhkku ja áddjá leaba du vähne-miid vähnemät, ja sudnos lea áhkku- ja áddjárolla du ektui. Soai leaba lunddo-laš ja lagaš oassi bearrašis. Sudnos lea dábálačcat buoret dilli ja **astu** mánáid-mánáiguin bargat oktasaš doaimmaid ja sin geahčcat bearrái. Áhkku ja áddjá sáhttiba oahpahit mánáidmánáide ollu das mo servodat lei ovdal, dalle go du vähnemät ledje mánát. Siesát, muotát ja goaskkit, eanu, eahki ja čeahce-rollat leat maiddái dehálaš servodat-rollat. Ristvähnemiidda leat erenoamáš vuordámušat sámi servodagas. Son árrat jo máná eallimis čadno ja hukse-goahtá oktavuođa mánnái. Dán láhkai son lea guovddáš olmmoš máná eallimis, ja son doaibmá maiddái máná **bajásgeassimis**.



Áddjá ja mánáidmánná.



Ristvähnemät.

astu friddjaáigi

bajásgeassimis veahkehit ja oahpahit máná oažžut buriid láhttenvugiid ja nana iešdovddu

Ii boares beana ciela duššiid

Lagašservodat

Lagašservodat lea báiki dahje báikegoddi gos don ja du bearáš orrot beaivválaččat. Lagašservodat lea unnit servodat gos olbmot dovddadit/diehtalit ja deaivvadit muhtimin beaivválaččat. Don ja earát geat ásset du lagašservodagas, leat dán servodahkii gullevaččat. Dis leat oktasaš njuolgga-dusat ja áddejupmi dasa mo heive láhttet guđet guimmiin.



Plassje márkanbáiki.

Friddjaáiggefálaldagat

Lagašservodagas leat muhtin fálaldagat gos olbmot sáhttet deaivvadit friddja-áiggis. Friddjaáiggefálaldagat dahket ahte olbmot loktet lagašservodagas, ja dat sáhttet boktit olbmuid miela **ásaiduvvat**. Dákkár fálaldagat leat searvvit, gurssat ja kulturfálaldagat.

Go ollugat beroštit seammá ášsis, de sii servet oktii ja ásahit searvvi. Searvvit sáhttet leat lášmmohallansearvvit, bivdosearvvit dahje politikhalaš searvvit.

.....
ásaiduvvat orrut

návddašeami vásuheami

Muhtin olbmot likojit friddjaáiggis oahppat ođđa doaimmaid. Sidjiide leat dávjá fálaldagat nu mo giellagurssat, duddjongurssat, bivdingurssat, dánsungurssat dahje málengurssat. Dákkár doaimmat leat eaktodáhtolačcat. Dat mearkkaša ahte daidda ii leat bággu searvat. Lagašservodaga olbmot daid ieža ásahit, ja gávdnet muhtimiid geat máhttet ja sáhttet oahpahit earáide.

Muđui leat kulturfálaldagat mat leat dušše **návddašeami** ja suohtastallama várás. Dat leat kino, girjerádjusat, teáhter, museat ja konsearttat. Eanaš fálaldagaid ovddas ferte máksit veahá.



Lášmmohallan lea dábálaš friddjaáiggedoaibma ollu nuoraid gaskkas.

Camilla liiko duddjot

Camilla liiko duddjot. Juohke manjne-bárgga/disdaga son vuolgá kulturskuvlla gursii oahppat duddjot. Dál son lea čuoldimin. "Mu mielas lea suohtas deaivvadit ja háleštit earáiguin geain leat seammá beroštumit go mus. Lea duođaid miellagiddevaš vá-sihit ahte mun gieđaiguin sáhtán duddjot atnuávdnasiid sihke sisttis, náhkis, čoarvvis, láiggis ja muoras." Gursa-oahpaheaddji lea hui gierdevaš. Činj HEAPMI ja goarrun sáhttá leat áddjás bargu, muhto dat šaddá loahpas hui čáppis. "Go mun lean geargan duod-jegurssas, de máhtán ieš duddjot ollu ávdnasiid, biktasiid ja činjaid. "



Muhtimat liikojit duddjot friddjaáiggis.



Ella Márjá ja Ella liikoba teáhtera čajáhhallat. Soai geavaheaba ollu áiggi dasa hárjehallat.

Du rollat lagašservodagas

Mii leat buohkat oassin lagašservodagas, ja mis leat iešguđet rollat lagašservodagas. Don leat oahppi, skihpár, skuvla-skihpár, gránnjá, mánna, oarpmealli dahje vilbealli, lášmmohalli, ja ollu eará. Lagašservodaga rollaid bokte mii dávjá šaddat deaivvadit ollu eará olbmui-guin geat maid gullet seammá lagaš-servodahkii.

Dat mearkkaša ahte don it leat okto, ja dál leat nu stuoris ahte dutnje leat

vuordámušat dasa mo láhttet iežat rollas. Lagašservodat vuordá ahte don váliddát ovddasvástádusa iežat rollain. Ovddasvástádus ja vuordámušat lassá-nit dađe mielde go don stuorut.

Juohke lagašservodagas leat áiggiid čađa šaddan njuolggadusat ja **vuordá-mušat** maid buohkat dovdet. Mii giit biepmu, veahki ja skeankkaid ovd-das, ja mii dearvvahit vuorraset ja amas olbmuid. Mii eat gaskkalduhte ságasteami ja mii ráiddus vuordit vuoru. Mii



veahkehit nuppi jos lea dárbu. Dákkár njuolggadusat eai čuoččo láhkagirjjiin, muhto mii čuovvut daid liikká, go mii diehtit ahte earát lagašservodagas vurdet dan mis. Jos mii dahkat juoidá mii ii leat nu buorre, de mii váldit **ovddasvás-tádusa** ja dahkat buori fas.

Dákkár njuolggadusat dahje vuordámušat lagašservodagas, dagahit buori birrasa ja buori eallima buohkaide geat áasset doppe.

.....
vuordámušat gáibádusat
ovddasvástádusa dagat dan mii
vurdo dus



Gándarolla.



Oahppiolla.

Čoahkkáigeassu

Servodaga rollat

Rollat leat olbmuid doaimmat servodagas. Juohke olbmos sáhttet leat máŋga rolla servodagas. Áhčci sáhttá leat sihke áhčci, buvdamielbargi, isit ja **skihpár**. Muhtin servodatrollaide mii riegádit. Dat leat sohkabeallerolla ja čearddalaš rolla. Dađistaga go stuorut, oaččut lassi servodatrollaid. Dakkár servodatrollat sáhttet leat oahppi ja skihpár. Rávisolmmožin beasat válljet servodatrollaid. Muhtimat šaddet doavttirin ja snihkkárin ja dahje dáidárin. Servodat vuordá ahte juohkehaš doaibmá bures iežas servodatrolls.

Nieiddat ja gánddat

Servodagas leat guokte sohkabeali, nissonbealli ja **almmáibealli**. Muhtin áššiid servodagas doaimmahit dábálaččat nissonat ja muhtin áššiid servodagas doaimmahit dábálaččat **albmát**. Dán mii gohčodit namain: **sohkabeallerollat**. Servodat iešguđet láhkai ávžžuha ja movttiidahttá nissoniid váljet rollaid mat leat albmái-

de dábálaččat, ja albmáid fas válljet rollaid mat leat nisso-niidda dábálaččat. Dán láhkai **eastadit** ahte bargosajiin leat measta beare nissonat dahje albmát.

Ruoktu, bearasha ja sohka

Ruoktu, bearasha ja sohka leat unnimus servodat, muh-to datte hui dehálaš. Ruoktu, bearasha ja sohka leat dehálaččat go dan siskkobealde mii oahppat buot maid mii dárbbasit dasa ahte birget servodagas. Servodagas leat mánggalágan bearrašat. Muhtin bearrašat leat unnit ja earát fas stuorrát.

Bearraša ja soga rollat

Bearraša lahtut ja rollat leat eadni, áhčci, dahje fuola-headdjít, vieljat, oappát ja soitet vel muotát, siesát, ednot ja eagit, sivjjogat ja má-gat, áhkut ja ádját ja vilbe-alit ja oarpmealit/oambealit. Sohka lea stuorát go bearasha, ja das leat ollu lahtut. Mii eat soaitte dovdat buoh-kaid seammá bures. Datte sohkii gullevašvuhta addá oadjebasvuða dovddu ja

identitehta čielggasvuða. Vuordámušat bearasha lahtuide leat ahte sii veahkehít ruovttudoalus ja ealáhusas nu fargga go nákcejit.

Lagašservodat

Lagašservodat lea báiki daje báikegoddí gos don ja du bearasha orru beaivválaččat. Doppe áasset sii geaiguin mii deaivvadit dávjá, ja sii geaiguin mii oassálas-tit ovttas friddjaággefá-laldagain, ja sii geaiguin mii ovttas skuvlla vázzit. Lagašservodat lea áiggiid čađa ovddidan njuolggadusaid ja vuordámušaid maid buohkat dovdagohtet dađistaga go sturrot. Dák-kár vuordámušat sáhttet leat ahte olbmot dearvvahit go oaidnalit, dahje ahte mii bisánit veahkehít jos muhtin fáhkka gahččá dahje buohccá.

•••••
skihpár olmmái
almmáibealli dievdobealli
albmát dievddut
eastadit hehttejít

Ohcci

Loga čoahkkáigeasu s. 30 ja vástit.

1. Mat leat servodaga rollat?
2. Makkár rollaide mii riegádit?
3. Makkár rollaid mii oažžut dađistaga go stuorrut?
4. Makkár rollaid mii sáhttit válljet?
5. Mii lea unnimus servodat?
6. Manne lea bearasha ja sohka nu dehálaš?
7. Makkár rollat leat bearrašis ja sogas?
8. Makkár vuordámušat leat servodagas bearasha lahtuide?
9. Mii lea lagašservodat?
10. Geat áasset lagašservodagas?
11. Maid vuordá lagašservodat ahte mii galgat máhittit?

Dahkki

1. Ságastehket olbmuiguin/bearasha lahtuiguin geat barget luondduealáhusain, omd. boazodoalus, šibitdoalus, guolástusas daje meahcásteamis. Ságastehket dan birra makkár rollat bearasha lahtuin leat ealáhusas.
2. Smiehta: Makkár rollat dus leat ovttä beaivvis? Ságastehket iežadet rollaid birra, ja mo don du rolla čoavddát!

Dutki

1. Veahkkedivššára bargu lea servodagas nu gohčoduvvon nissonbargu. Dat mearkkaša ahte ollu eambbo nissonolbmot go **almmáiolbmot** barget veahkkedivššárin. Guorahallet man ollugat barget veahkkedivššárin lagašservodagas, ja man gallis sis leat albmát. Guorahallet seammá snihkkáriid gaskkas.
2. Jearahallet olbmuid dan birra makkár rollat sis leat servodagas. Dahkhet čuoldadiagramma mii čájeha makkár rollat leat eanemusat din lagašservodagas.
3. Válljejehket ovttä vahku goas dii moddjájehket ja dearvvahehpét olbmuid geat áasset din lagašservodagas. Čállet beaivegiriji das mo don vásihit dán? Ságastehket dan birra ceahkis vahku loahpas.

.....
almmáiolbmot dievdoolbmot



3. Stuorraservodat

Dán oasis oahpat

- Mii stuorraservodat lea
- Makkár doaimmat stuorraservodagas leat
- Mii skuvla lea
- Mii givssideapmi lea
- Hábmet servodatlaš gažaldaga, evttohit čilgehusa, plánet ja čađahit dutkosa

Mii lea stuorraservodat?

Buohkat geat ásset muhtin riikkas dahje viiddis guovllus, leat miellahtut stuorraservodagas. Dan mii gohčodit *Norgga servodahkan* ja *Sámi servodahkan*. Stuorraservodaga miellahtuin lea juoga oktasaš. Sii ellet ovttas seamá guovllus dahje riikkas, ja sis leat oktasaš njuolggadusat mat muitalit mo heive láhttet guđet guimmiin.

Stuorraservodat **fuolaha** daid stuorra bargguid maid mii bearrašis dahje lagašservodagas eat nagot okto doaimmahit. Dakkár barggut leat earret eará geainnuid ráhkadit, olbmuid dearvvašvuoda ja sihkkarvuoda gozihit, doabbariid meannudit ja vuodđooahpu fállat álbmogii sihke sáme-gillii ja dárogillii. Muhtimin olbmot fárrejít ja ásaiduvvet eará guovlluide Sámis dahje Norggas. Stuorraservodat galgá fállat seammá bálvalusaíd beroškeahttá gosa olbmot fárrejít.

fuolaha bargá, čadaha

Bargu dahkkis rámida

Pedár fárre Kárášjohkii

Pedár čohkká lanjastis. Son čohkká ja smiehttá ahte dán lanja son ferte guodđit. Dán lanja gos heangájít Manchester United govat ja man uvssa son mángii lea čievččastan gitta go áhčči lea hoavrres-tišgoahktán. Heika ja Áile boahtiba sis...

Heika: Mii dus lea Pedár?

Pedár: Na.....

Heika: Lea go dus váivi?

Pedár: Várra....

Heika: Manne nu?

Áile: Mii lea geavvan? Lea go dus váivi?

Pedár: Na. Ferten fárret.

Áile: Fárret? Gosa?

Pedár: Kárášjohkii.

Heika: Mo nu ges?

Pedár: Na, eatni bargu lea dohko fárre-min. Ja go áhčči bargá Sámedikkis, de heive fárret Kárášjohkii.

Áile: Muhto, háliidat go fárret
Kárášjohkii?


Pedár: In de hálit! Soai eaba jeara mus
maid mun háliidan!

Heika: Kárášjogas lea máilmimi fiinna
vuojadanhálla!

Áile: Ja doppe lea maid čierastanluohkká!

Pedár: Muhto doppe eai leat mu skihpárat!

Heika: It go jáhke mii boahtit dohko
galledit?



Áile: Ii han bussiin ádján go moadde
diimmu Kárášjohkii.

Heika: Ja don sáhtát maid deike boahtit
muhtumin.

Pedár. Na. Lean gal dan jurddašan. Muhto in hálit liikká fárret. Go in dovdda in ovttage doppe.

Áile: Mus lea doppe vilbealli. Ja son lea
seammá boaris go mii.

Pedár: Láve go son čuoigat?

Áile: Láve go čuoigat? Don han dovddat
su! Kenneth gii finai dáppe juovllaid áigge.
Son searvvai daidda ILAR-doaluide.

Pedár: Duot čuvgesvuovttat gánta?

Áile: Diet fal.

Heika: Mun maid muittán su. Son orui
leamen šiega.

Áile: Son lea šiega. Dus lea measta
skihpár Kárášjogas juo!

Stuorraservodaga doaimmat

Suodjalus

Politiija barggut

Sii geat barget politijjan, galget geahčat bearrái ahte ortnet bissu doppe gos ollu olbmot leat čoahkis. Dat sáhttet leat ávvudoalut, festiválat, riemut, valáštallamat dahje **miellačájeheamit**. Politija galgá maid geahčat bearrái ahte olbmot čuvvot **johtalus**nuolggadusaid.

.....

miellačájeheamit ollugat čoahkkanit čájehit maid sii oaivvildit muhtin ášsis. Dávjá sis leat pláhkáhat ja čurvot cealkámušaid.

.....

Sii bissehit biilavuddjiid ja isket sihke biillaid teknihkalaš beliid ja olbmuid. Politijat ságastit ollu ja dávjá mánáiguin ja nuoraiguin. Dan sii dahkanet vai nuorat eai nu álkit seaguhuvvo **lobihisvuodaide**. Politijat galget maid dutkat lobihisvuodaid mat leat dakhkon ja gádjunbargguid jođihit.

.....

johtalus sii geat johtet vácci dahje vuoji geainnuid alde leat johtalusas.

lobihisvuodaide daguide maid ii leat lohpi dahkanet



Politijat ságastit dávjá mánáiguin.

Buollin- ja suodjalusdoaimmehat

Buollin- ja suodjalusdoaimmehat galgá čáskadit jos ásodat dahje huksehus buollá. Dasa lassin galgá **suddjet** gieldda/suohkana álbumoga ja elliid lihkuhisvuodain nu mo stuorra dulvviin ja eará **luondduroasuín**. Buollinčáskadanbiillas galget leat visot ávdnasat ja **suodjalusat** maid **suodjaleaddjit** dárbbasit. Sii galget oahppat ja hárjánit dákkár váralaš barggu máhttit čoavdit. Buollin- ja suodjalusdoaimmehat galgá maid skuvlahoppiid ja earáid oahpahit mo geavahit **buollinčáskadanreidduid** ja mo sii galget **eastadit** buollimis.

suddjet várjalit dahje veahkehit

luondduroasuín issoras dáhpáhus-ain mat luonddus gevvet, omd. badjel-meare dulvi, uðas, eanandoarggástus, buollašat, goikkádagat, garra orkánat mat gaikkodit ja billistit

suodjalusat ávdnasat ja biktasat mat suddjejit váralašvuodaid vuostá omd. dola vuostá

suodjaleaddjit olmmoš gii veahkeha nuppi eret váralaš báikkis, omd. buollimis

buollinčáskadanreidduid ávnnaš maid dárbbasha go áigu buollima čáskadit, omd. bulvvarapparáhta ja dihto biktasat mat girdet dola

eastadit hehttet dáhpáhuvvamis



Buollinčáskadeaddji čáskadeamen buollima.



Suodjalus

Norggas lea suodjalus mii galgá suodjalit riikka jos eará riikkat dahje vašálaččat áitet fallehit guovlluid mat leat Norgga riikkarájiid siskkobealde. Suodjalus goziha ahte Norgga ja Sámi álbtom galgá sáhttit oadjebas dilis orrut ja eallit. Dat lea dehálaš bargu ja dasa dárbašuvvojit ollu olbtom ja fievrut dego girdit, skiippat, ja eará ávdnasat dego erenoamáš **vearjjut**, IT-reaiddut ja biktasat. Sii galget ollu hárjehallat ja leat gárvásat doaibmagoahtit jos dárbu. Sii geat barget suodjalusas, sáhttet bargat mánggalágan rollain suodjalusas. Muhtimat barget goahkkan, ja earát fas **vákšun** dahje soalddáhin. Stuorraservodat vuordá ahte suodjaleaddjít dovdet iežaset rolla servodagas, ja ahte sii doibmet iežaset rollas nu mo njuolggadusat muitalit.



vearjjut, vearjjut sáhttet leat bissut ja bávkkanasat

vákšun čuovvut ja árvvoštallat olbmuid dahje eiseválddiid doaimmaid ja áigumušaid

Suodjaleaddjít hárjehallamin.

Doabbariid meannudit

Mis báhcet beaivválaččat ávdnasat, garat, borramušat ja **skoaddasat** maid eat dárbbas dahje mat guohcagit. Dat leat doabbarat, ja daid mii bálkestit doapparlihttái. Leat go smiehttan gosa doabbarat šaddet? Doapparbiila gurre doapparlihti juohke vahkus. Sii devdet guorbmebiilla doabbariigun, ja gurrejít dan **doapparduvdnái** maid **eiseválddit** leat ásahan ja dohkkehan dohkálaš **doapparbáikin**. Doapparbáikkis barget ollu olbmot. Muhtimat váldet vuostá buot doabbariid ja earát fas vudjet stuorra mašiinnain ja dulbmet doabbariid. Muhtin doabbariid ii leat lohpi bálkestit doapparduvdnái. Dain sáhttet leat váralaš ávdnasat mat bilidit luonddu. Dákkár doabbariin fertet vuos váldit eret dan váralaš ávdnasa ja dan ferte **meannudit** sierraláhkái vai ii bilit luonddu.



Doabbariid maid ii sáhte odđasit geavahit, sáhttá boaldit stuorra oapmaniin. Lieggsaín mii das šaddá, sáhttá fas ligget ollu dáluid.

skoaddasat olggožat man sisa gálvu
lea páhkkejuvvon

doapparduvdnái duvdni gosa doabbarat
čohkkejuvvojít

eiseválddit sii geat mearridit

doapparbáikin báiki gosa doabbarat
šaddet dahje čohkkejuvvojít

meannudit giedjahallat

Muhtin doabbariid sáhttá oddasit geavahit

Doapparhivvodat lea menddo sakka sturron manjimuš áiggiid. Ii leat šat sadji vurket buot doabbariid. Eiseválldit leat ásahan doaimmaid mat galget unnidit doapparhivvoda. Dál leat ásahuvvon báikkit gosa olbmot sáhttet bidjat guoros skoaððasiid. Alumiidna, bábir, plastikhka, glássa dahje láse ja ollu eará ávdnasat sáhttet šaddat oðða ávnna-sin fas. **Borramušbázahusat** eanaluvvet, ja eai leat vahágíin lundai. Dán láhkai mii sáhttit hehttet doapparhivvoda šaddamis, ja muhtin ávdnasat šadet oðða ávnna-sin.

.....
doapparhivvodat doapparsturrodat
borramušbázahusat borramušat mat leat báhcán go lea gallánan, dahje mat leat guohcagan ja ii sáhte šat borrat daid



Doapparsirren. Muhtin doabbariid sáhttá geavahit oððasit.



Báhpáris sáhttá ráhkadit oðða báhpára.

Dearvvašvuodabálvalus

Leat iešguðetlágan barggut dearvvašvuoda **suorggis**. Jos dearvvašvuodabar-git galget iežaset rollas doaibmat bures, de sii galget máhttít sihke sámegiela ja dárogiela bures vai olles riikka álmogii lea buorre dearvvašvuodafálaldat.

Dearvvašvuodadivššár

Dearvvašvuodadivššáris lea divššodat gieldda dahje suohkana dearvvašvuodaguovddážis. Doppe son válzá vuostá buot mánáid geat eai leat vel skuvlii álgán. Dearvvašvuodadivššár fitná muhtimin skuvllas maid. Son galgá geahčat bearrái ahte buot mánáin leat muttágis oaidnu, gullu, allodat ja deaddu. Dasa lassin son **galgá boahkuhit** buot ohppiid, nu ahte sii eai oaččo váralaš dávddaíd. Son galgá maid oah-pahit mánáid mo rupmaša dikšut, maid borrat ja mo gárvodit ja lihkadir. Muhtimin son **hálešta** mánáiguin ja nuo-raiguin dovdduid birra. Buot dát lea nuvttá.



Dearvvašvuodadivššár boahkuha buot mánáid, vai sidjide eai bastte váralaš njoammudávddat.

suorggis oasis, bealis

boahkuhit addit sprøyttain ávdnasa rupmašii vai ii rumaš ii oačču váralaš dávddaíd

hálešta humada

Doavttir

Muhtimin mii buohccát dahje bávččagit nu garrisit ahte dárbbáshit doaktáris veahki dearvvasmuvvat. Dalle fertet mannat doaktára lusa. Son iská ja dutká. Jos son ii gávnnaat mii lea váttuid, de son sádde min viidáseappot doaktáriidda geat dihtet ollu dan bákčasa birra. Doavtteráiggi ovddas ferte máksit. Mánáide vuollil čieža jagi lea nuvttá.

.....
rumašlahtuid giehta lea okta rumašlahttu

Buohcceviessu

Jos doavttir ii sáhte dikšut buohcci nu ahte dearvvasmuvvá, de ferte buohccevissui. Buohccebilla boahtá de viežzat su, ja doalvu buohccevissui.

Buohcceviesus barget ollu dearvvaš-vuodabargit iešguđet ossodagain. Muhtimat barget riegádahttinossodagas, earát fas mánáidossodagas ja fas earát vuostáiváldimis. Gávdnojít mánga dákkár ossodaga iešguđet buohcceviesus. Doppe barget doaktárat ja eará bargit geat dihtet ollu iešguđet dávddaid dahje **rumašlahtuid** birra.




Doavttir ságasteamen pasieanttain.



Hámmárfeastta buohcceviessu.

Bátnedoavttir

Buot mánát galget golmma lagi rájes juohke lagi fitnat bátnedoaktára luhtte iskamin bániid. Bátnedoavttir iská ja divvu bániid ráiggiid. Dasa lassin son oahpaha mánáide ja váhnemiidda mo sii galget bániid dikšut vai dat bistet guhká. Bátnedoavtterbálvalus lea nuvttá dassá go deavddát 18 lagi.



Bátnedoavttir.



Einar lea buohccebiilavuoddji.



Buohccebiillas leat ollu dávvirat mat dárbbašuvvojat heakka gádjumis. Das leat šerres ivdni, čuovggat ja garra jietna vai eará johtaleaddjit áddejtit čáhkket ja buohccebiila johtilit beassá buohcnevissui.

Buohccebiilavuoddji

Einar lea buohccebiilavuoddji. Buohccebiilavuoddji galgá leat gárvvis vuoddját viežzat olbmuid geat leat garrisit buohcán dahje lihkohisvuodas bártašuvvan. Buohccebiilavuoddji galgá gárvodit dihito biktasiiguin go lea barggus. Sus galgá maid leat sierra biila mas leat dihito ivnnit ja rusttegat. Rusttegat galget leat ávkin olbmuid gádjumis jos lea heakkavárra. Son galgá máhttít ollu das mo gádjut olbmuid ja bisuhit heakka. Son galgá máhttít biilla



Son gii áigu bargat buohccebiilavuoddjin, ferte hárje-hallat ollu vai son diehtá mo galgá heakka gádjut.

vuodjit ja doalvut olbmuid buohcnevissui johtilit. Jos lea dárbu, de son ferte bidjat čuovggaid ja jiena biili, vai earát oidnet ja gullet, ja čáhkkejtit saji geainnus go son boahttá vuoji. Juohke gielddas dahje suohkanis leat buohccebiillat ja buohccebiilavuoddjit. Buohccebiilavuoddji galgá leat oahpis miehtá gieldda/suohkana ja dovdat buot báikenamaid vai johtilit sáhttá joavdat báikái gos lea geavvan buohcuvuohta dahje lihkohisvuolta.

Dulkonbálvalus

Servodagas gullojtit ollu gielat. Sáme-giella ja dárogiella leat Norgga almmolaš gielat. Dat mearkkaša ahte buohkat galget sáhttit geavahit guktui gie-laid buot almmolaš dilálašvuodain ja oktavuođain nu mo **gielddavistis**, čoahkkimiin ja doaktára luhtte. Buohkat galget sáhttit **gulahallat** dan gil-lii mii sidjiide lea lunddoleamos. Datte eai buohkat ádde guktui gielaid. Dalle dárbbasuvvo dulka. Dulka galgá dulkot sihke dárogillii ja sámegillii. Son ferte máhttit guktui gielaid hui bures.

IT

Ollu servodatdoaimmaid sáhttit mii ieža doaimmahit. Dasa dárbbasít IT-gulahallan vejolašvuodaid. Mii sáhttit rehkegiid máksit interneahta bokte, ja mii sáhttit gálvvuid oastit interneahta bokte. Mii sáhttit vel oahpu ge oažzut interneahta bokte. Ollu servodatdoaimmat sirdojuvvojit dađistaga internehttii. Doppe mii ieža sáhttit daid čoavdit, is-kat ja čuovvut.




gulahallat ságastit, dadjat, háleštit

gielddavistis suohkanviesus



Juhán Niillas lea dulka. Dás son lea dulkomin muhtun somás muitalusa. Olbmot geat hállet čoahkkimis, fertejít hállat mikrofuvdnii. Juhán Niillas gullá maid sii dadjet ja dulko sin ságaid nuppi gillii. Sii geat dárbbasít dulkojumi, geavahit bealljebilttuid gos gullet maid Juhán dulko.



Skuvlaservodat

Skuvla lea okta daid deháleamos ása-husain servodagas, danne go dat galgá fállat vuodđooahpu olles riikka álbmogii. Min servodat dárbaša olbmuid geat máhttet iešguđetlágan doaimmaid. Dan máhtu oačut go váccát skuvlla, ja čuovut mielde oahpahusas. Dalle sáhtát válljet maid don áiggut bargat servodagas go stuorut.

Eanaš mánát álget skuvlii dan jagi go devdet 6 jagi, ja šaddet **oassin skuvla-**

servodahkii. Mánát álget dan skuvlii mii lea sin lagašservodagas.

Ollu olbmot oassálastet skuvlaservo-dahkii, ja sis leat iešguđet rollat skuvla-servodagas. Muhtimat leat oahpahead-djít ja muhtimat fas oahppit ja earát fas bassit ja assisteanttat. Dábálaččat leat maiddái kánturbargit ja rektor. Jos skuvlaservodat galgá doaibmat bures, fertejit buohkat ovttas čoavdit áššiid, ja deavdit iežaset rolla bures.

oassin skuvlaservodahkii skuvla-servodaga miellahtut

Ii oahppa deatte



Oahppit skuvllas.

Oahppirolla

Don leat oahppi skuvllas, ja dus lea dalle oahppirolla skuvlaservodagas. Dat mearkkaša ahte dutnje leat vuordámušat. Jos don galggat sáhttit deavdit iežat rolla bures, de fertet diehtit makkár vuordámušat dutnje leat:

- **Don galggat leat buorre skuvlaskihpár dahje olmmái**
- **Don galggat leavssuid bargat**
- **Don galggat čuovvut skuvlla njuolggadusaid**
- **Don galggat earáiguin bargat ovttas**
- **Don galggat áiggil boahtit oahpahussii**
- **Dus galget leat buot skuvla-girjjit ja skuvlaávdnasat mielde**



Go mii álgit skuvlìi, de mii biddjot muhtin **ceahkkái**. Mii eat sáhte válljet geaiguin mii háliidit leat ovttas. Mii gal-gat ovttastallat buohkaiguin ceahkis mánga jagi. Buohkain ceahkis leat seam-má **vuoigatvuodat**. Dat mearkkaša ahte buohkat galget dovdat ahte sidjiide lea bures boahtin, ja ahte sis lea oadjebas dilli skuvllas. Buohkat skuvlaservodagas galget geahčat bearrái ahte buohkain lea buorre dilli skuvlaservodagas. Don leat oahppi, ja deháleamos oassi oahppirollas lea leahkit buorre skuvla-skihpár.

.....

ceahkkái luohkkái

vuoigatvuodat rievttit

Stuorraservodat galgá álbmo-giï fuolahit:

- **Oahpahusa**
- **Suodjalusa**
- **Geainnuid**
- **IT-gulahallanvejolašvuodaid**
- **Dearvvašvuodabálvalusaid**
- **Doapparieččahaga**

.....
fuolahit fállat, addit

Riiddut ja givssideapmi servodagas

Riiddut

Servodagas ellet ollu olbmot ovttas. Dalle sáhttet bohciidit riiddut. Riiddut šaddet go olbmuin leat iešguđetlágan oaivilat ovta ášsis.

Máŋggaoaivilvuohta lea buorre ja áib-bas dábálaš, ja dat ii leat váralaš. Dat lea buorre ahte olbmuin lea máŋgga-oaivilvuohta, go dalle sáhttet digaštallat ja oahppat guđet guimmiin. Máŋggaoaivilvuohta šaddá váralaš jos sii suh-tadišgohtet ja bealkigohtet. Muhtimin

dáhpáhuvvá ahte sii doaráskit maid.

Dalle mii fertet oahppat ja geavahit bu-riid vugiid mo čoavdit riidduid. Háleštit ja ságastit lea buoremus vuohki mo čoavdit riiddu. Datte dat ii leat álki jos lea suhttan. Sáhttá leat vuogas ahte soai geat leaba suhtadan, mannaba vuos oanehis boddui goabbat sadjái. Dalle beassaba veahá jaskkodit ja smiehttat ášši birra. Hálešteamis galgaba guktot bealit dovdat ahte soai leaba duhtavač-čat čovdosiin.



Muhtimin bohciidit riiddut mat šaddet nu garrasat ahte doaráskit.



Hállat riidduid birra ja čielggadit áššiid lea buorre vuohki čoavdit riidduid.

Mii lea givssideapmi ja mo dáhpáhuvvá dat?

Servodagas ovttastallet ja deaivvadit ollu olbmot. Danne sáhttá dáhpáhuvvat givssideapmi. Skuvllas leat ollu oahppit ja givssideapmi skuvllas lea stuorra vát-tisvuohtan sidjiide geat dan vásihit.

Givssideapmi lea go muhtumat diehto-mielain illástit dahje láhttejít fasttit nup-piin olbmuin. Olmmoš gii givssiduv-vo, ii sáhte vuostálastit givssideami go dávjá son lea okto ollugiid vuostá. Dák-kár **unohis** láhtten sáhttá mángii, dahje guhkit áiggi badjel dáhpáhuvvat.

Buot olbmot leat sierraláganat. Mis leat iešguđetlágan hámit, mii máhttít iešguđetlágan doaimmaid, ja mis leat iešguđetlágan beroštumit. Juohke ol-bmos lea **riekti** leat nu mo son lea. Su ii oaččo givssidit dainna.

.....

unohis váivves, ii dohkálaš

riekti vuogatvuohta

olggúšteapmi ii oaččo searvat jokkui

fuonášit hejošit

Givssideapmi sáhttá dáhpá-huvvat ná:

- **Olggušteapmi stoahkamis ja joavko-bargguin**
- **Sealggeduohkin fuonášit earáid**
- **Gohčoduvvot fasttes sánliguin**
- **Huškojuvvot, cábmojuvvot**
- **Hárdašuvvot biktasiiddis, hámi, beroštumiid, giela dahje ávdnasiid geažil**

Givssideapmi guoská olles skuvlii, ol-les ceahkkái, váhnemiidda, rektorii ja



Givssideapmi skuvllas lea stuorra vát-tisvuohtan ollu mánáide. Muhtimat olggúštuvvojít ja earát fas gillájít duođalaš illástemiid.

oahpahedjiide! Dat mearkkaša ahte lea sihke ohppiid, váhnemiid, oahpahedjiid ja rektora ovddasvástádus bissehit ja heaitihit givssideami.

Mo váikuha givssideapmi?

Givssideapmi lea duođalaš ášši sidjiide geat dan vásihit. Givssideapmi sáhttá bilidit nuppi olbmo eallima nu ahte son **rávisolmmožin** ii sáhte bargat ja doaibmat dábálaččat servodagas. Givssideamis leat guokte beali. Okta lea son gii givssiduvvo ja nubbi lea son, dahje sii geat givssidit.

Son gii givssiduvvo, sáhttá **ovddidit psyhkalaš váttisvuodaid** mat bistet guhká maŋjá go givssideapmi lea nohkan. Son sáhttá dovdat **oktonasuoda** ja lossa váivvi. Son sáhttá maid dovdat ahte sus ii leat árvu ja ahte son lea fuones olmmoš. Dasa lassin sáhttá son jurdadašit **iešsorbmema** birra. Muhtimin lea dáhpáhuvvan ahte nuorat geat leat guhká givssiduvvon, leat sorbmen iežaset.

Son dahje sii geat givssidit, sáhttet ovddidit meanuid mat eai dohkkehuvvo servodagas. Dat sáhttet leat dagut mat garrisit čuhcet earáide, ovdamearkka dihte **illásteamit**, áitagat, veahkaváldimatt ja eará **láhkarihkumát**.



- Son gii givssiduvvo, dovdá oktonasuoda ja lossa váivvi. Dakkár dovddut sáhttet bistit guhká.

- • • • • • • • • • • • • • • •
- **rávisolmmožin** ollesolmmožin
- **ovddidit** oažžut
- **psyhkalaš váttisvuodaid** váttisvuodat dahje dávddat mat čuhcet dovdduide ja millii
- **oktonasuoda** dovdat ahte son lea okto, ii ovttastala ja gáimmat eará olbmuiguin
- **iešsorbmema** iešgoddima
- **illásteamit** huškut, cápmít ja eará láhkai fysalaččat bávččagahttit/hávváduhttit
- nuppi olbmo
- **láhkarihkumát** kriminalitehta

Mo bissehit givssideami?

Givssideapmi lea álo boastut. Muhtimin soaittát gullan: "Ii leat imaš ahte son givssiduvvo, son han láhtte nu ártegit." Jos mii dadjat ná, de leat mii doarjumin su dahje sin geat givssidit.

Don galggat álo diedihit jos fuomášat ahte muhtin givssiduvvo. Jos it diedít, de don leat ieš mielde givssideamen su. Don galggat diedihit váhnemiidda, oahpaheddjiide, rektorii dahje eará **rávisolbmuide** skuvllas.

Buot skuvllain leat njuolggadusat maid buohkat galget čuovvut. Ollu skuvllain leat njuolggadusat mat čilgejit mo gallá bissehit givssideami. Muhtimat gal-

get orrut siste bottuin, earát galget čállit vuollái šiehtadusa maid galget čuovvut. Muhtimat galget čuovvut oahpaheddjiid dahje váhnemiid skuvllas. Gávdnojít mánggalágan čovdosa dása. Lea dehálaš ásaht njuolggadusaid dasa ahte mii geavvá jos givssida earáid. Lea maiddái dehálaš ahte skuvla geahčá bearrái ja ásaha buorre **birrasa** buohkaide.

Ceahkis gos buohkat leat oadjebasat ja skihpáračat, ja ii oktage olgguštuuvvo mainna ge lágiin, ii leat givssideapmi. Juohke ceahkis várra gávdnojít oahppit geat vigget earáid duolbmut, fuonášit ja **vealahit**. Muhto jos oahpaheaddjit ja eará oahppit eai divtte, eai suova, eaige dohkket givssideami, de givssideapmi soaitá nohkat. Dii sáhtibehtet **ieža gaskaneaset** soahpat ahte ehpet hálit givssideami din ceahkis.



Ferte hállat dahje hupmat ceahkis givssideami birra ja šaddat ovtaaoivil dasa ahte mii eat hálit givssideami min ceahkis.

rávisolbmuide ollesolbmuide

birrasa skuvladilli, oahppandilli

vealahit olgguštit

ieža gaskaneaset iežadet gaskkas

Dáppi ii leat lohpi givssidit earáid

Givssideapmi dáhpáhuvvá ná:

- Olggušteapmi stoahkamis ja joavkobargguin
- Sealggeduohkin hállat
- Gohčoduvvot fasttes sániiguin
- Huškojuvvot, cábmojuvvot
- Hárdašuvvot biktasiiddis, hámi, beroštumiid, giela dahje ávdnasiid geažil

Givssideami sáhttá bissehit ná:

- Álo diedđihit rávisolbmuide, jos fuomáša givssideami
- Hállat dávjá dan birra sihke ruovttus ja skuvllas
- Ásahit njuolggadusaid mat muitalit čielgasit mo gal-gá meannudit su gii givssida earáid.
- Mearridit ceahkis ahte dii ehpet áiggo givssidit earáid

Givssideapmi sáhttá váik-kuhit ná:

- Oktonasuodža dovdú
- Lossa váivvi
- Jurddaša son lea fuones olmmoš
- Árvvoštallá iešsorbmema
- Kriminála láhttenvuogit

olgušteapmi ii oaččo searvat jokui
hállat hupmat
fuones heajos

Čoahkkáigeassu

Stuorraservodat

Stuorraservodat lea olles rii-ka dahje álbmot. Dan mii gohčodit *Norgga servodahkan* dahje *Sámi servodahkan*. Stuorraservodat fuolaha daid stuorra bargguid maid mii bearrašis dahje lagašservodagas eat nagot okto doaimmahit.

Stuorraservodaga doaimmat

Stuorraservodat galgá fál-lat olbmuide oahpu, dearv-vašvuoden bálvalusaid, politiija, buvddaid, geainnuid ja IT-gulahallan vejolašvuohta galgá gávdnot vaikko gos riikkas mii ássat. Stuorraservodat galgá geahčcat bearrái ja fállat dáid buot riikka dahje guovllu ássiide.

Skuvla

Mánná álgá skuvlii dan jagi go deavdá 6 lagi. Skuvllas leat ollu oahppit, oahpa-headdjít, rektor, bassi, **viessohoaiidár** ja veahkke-bargit. Juohkehaš ferte su iežas rollas doaibmat bureas vai servodat doaibmá. Dalle lea dehálaš ahte juohkehaš diehtá man láhkai son galgá iežas rollas doaibmat. Dus lea oahppirolla skuvllas. Skuvlaservodat vuordá ahte oahppi bargá leavssuid, láhtte čábbát eará ohppiiguin ja rávisolbmuiguin skuvllas, ja ahte son čuovvu skuvlla njuolggadusaid.

Riiddut ja givssideapmi

Skuvllas ja eará lagaš-servodaga doaimmain leat ollu mánát ja nuorat čoahkis. Dalle sáhttet **bohcii-dit** riiddut ja givssideapmi. Riiddut leat dábálaččat ja buorit jos mii daid meannudit rivttes láhkai. Givssideapmi lea go muhtumat diehtomielain dávjá, dahje guhkes áigge badjel **illás-tit**, olguštit dahje láhttejít fasttit nuppiiguin. Dan váik-kuhusat sáhttet bilidit nuppi olbmo eallima, nu ahte son ii sáhte bargat ja doaibmat dábálaččat servodagas. Givssideami galgá álo dieđihit, ja dan lea buoremus bis-sehit ságasteami, šiehtadeami ja čuovvuleami bokte.

viessohoaiidár son gii divvu osiid mat gullet skuvlii; seinniid, glásaid dahje čuovgapearaid molsut

bohciidit šaddat, vuolggahuvvot

illástit, huškot, čorbmét dahje čikčet

**Bissehit givssideami lea
maiddái DU ovddasvástádus**

Ohcci

Loga čoahkkáigeasu s. 54 ja vástit.

1. Mii lea stuorraservodat?
2. Namut golbma dehálaš fálaldaga stuorra-servodagas!
3. Namut guokte vuordámuša mat leat servo-dagas ohppiidrollii?
4. Manne šaddet riiddut olbmuid gaskkas?
5. Mii lea givssideapmi?
6. Mo sáhttá givssideapmi váikkuhit olbmuide geat dan vásihit?
7. Namut ovta vuogi mo bissehit givssideami!

Dahkki

1. Jearahallan: Jearahala olbmuid geain leat eará rollat go dus! Makkár servodatrollat leat sis ja mo sii vásihit ja čovdet iežaset servodatrolla?
2. Hutket ja dahkhet čajálmasa mas dis leat iešguđet rollat. Čajekehket earáide.
3. Lohkhet riikka áviissa ovta vahku! Merke-jehket guđe stuorraservodaga rollat leat namuhuvvon áviissain dan vahku!

4. Servodagas bohciidit dávjá riiddut olbmuid gaskkas. Givssideapmi lea stuorra váttis-vuohta servodagas ja skuvllain. Digaštallet mo sáhttá heitthiit ja bissehit givssideami servodagas. Evttohehket čovdosa mii sáht-tá bissehit givssideami din servodagas.
5. Máŋgaoaivilvuhta muhtin áššiin lea buorre, go dalle mii beassat digaštallat ja gullat ja oahppat eambbo ášši birra. Dal-le dávjá gávdnat čovdosiid riidduide. Leat go din ceahkis ášshit maiguin ehpét leat ovt-taoavilat? Digaštallet ášši/áššiid/riidduid joavkkuin ja geahččalehkvet gávdnat čovdosa riidui!
6. Hutkka, hábme ja sárggu galbba mas čuožžu: BISSET GIVSSIDEAMI! Darvit ceahkkelanja seaidnái muittuhussan.

Dutki

1. Dutket mii geavvá doabbariin din gield-das/suohkanis! Hábmejehket gažaldaga, evttohehket čilgehusaid, dahket plána ja čaðahehket dutkosa! Árvvoštallet mo heive earáide ovdanbuktit dan maid lehpet gávn-nahan: Sárggusráidu, govvaráidu, filbma, áviisaartihkal, beaivegirji, muiatalus dahje eará.




4. Neahttaservodagat

Dán oasis oahpat

- Mat neahttaservodagat leat
- Makkár neahttaservodagat gávdnojit
- Mo neahttaservodagain heive láhttet



IT-ávdnasat leat nu vuohkkasat ahte daid sáhttá álkit dohpet mielde.



Mii lea neahttaservodat?

Neahttaservodagat leat nu go eará servodagat, muhto dat doibmet dušše interneahtas, ja don mearridat ieš goas don háliidat searvat ja goas it.

Doppe leat deaivvadanbáikkit, báŋkkut, poasta, buvddat, girjjit, TV, musihkka, filmmat, skuvllat, spealut, doaktárat, ja ollu eará. Mii sáhttít daid **fievrredit fárus** álu, go IT-ávd-nasat nu go smartphone vuohkkasit heivejít lubmii dahje lávkii. Dáinna lágiin mii sáhttít gulahallat ja speallat earáigui, geahččat TV ja filmmaid dahje gávppašit goas heive.

•
•
•
•
•
•
•
•
•
•
•
•

fievrredit fárus váldit
mielde

Makkár neahttaservodagat gávdnojit?

Facebook, instagram, youtube, skype, snapchat ja twitter leat sosiála neahttaservodagat gos olbmot deaivvadit.

Dat leat vuohkkasat go áigu gulahallat skihpáriin ja fulkkiin geat orrot eará guovlluin máilmmis. Mii sáhttit singuin gulahallat vaikko goas, ja čuovvut sin eallima sihke goavid, filmmaid ja ságaid bokte.

Bloggen lea vuohki mo **almmuhit** earáide iežas máhtu, vásáhusaid, jurdagiid ja beroštumiid. **Bloggárat** čállet nehttii iežaset beroštumiid, jurdagiid ja maid sii liikojit bargat **astoáiggis** dahje bargus. Muhtimat govvejít ja čállet iežaset gárvvuid birra, dahje makkár sin dállu lea oaidnit. Earát fas muitalit ja čállet servodatáššiid dahje dearvvašvuodááššiid birra main sii beroštit. Fas earát muitalit ja čállet man guhkás ja johtilit sii leat sihkkelastán dahje viehkan. Olbmot geat beroštit seammá ášsis ja čuvvot blogga, šaddet bloggalohkkin. Bloggalohkkit sáhttet kommenteret dan maid bloggár almmuha.

Gálvovuovdin ja -oastin dáhpáhuvvá viidábut neahdas. Ollu neahttaservoda-

The screenshot shows a blog post titled "Eaillin - eallimat" dated April 10, 2014, at 11:17:58. The post discusses energy consumption and environmental issues. It includes a photo of a woman in traditional Sami clothing. The text is in Sami and discusses energy efficiency and environmental awareness.

Blogga.

The screenshot shows a CDON.COM website with a "SALG" (Sale) banner. It features various discounted products, including a laptop and a smartphone, with significant discounts like -70%.

almmuhit čájehit

bloggárat sii geat hábmejít ja čállet bloggii

astoáiggis friddjaáiggis


gat ja neahtabuvddat fállit iešguðet-lágan gálvvuid vuovdimassii. Doppe sáhttá oastit musihka, filmmaid, bikta-siid, IT-ávdnasiid, spealuid, biillaid, mátkkiid ja ollu eará. Muhtimat leat **ásahan** neahttaservodagaid gos sáhttá oastit ja vuovdit geavahuvvon biktasiid ja ávdnasiid. Buorre lea ahte muhtimat háliidit vuovdit ávdnasiid dan sadjái go bálkestit daid. Soaitá muhtin dárbaša juste dan ávdnasa maid nubbi áigu bál-kestit **ruskaduvdnái**.

Bánkkuin leat neahttiiddut gos olbmot sáhttet **logget** máksit rehke-giid, ohcat loanaid ja ruðaid sirddasít. Neahtabáñkkut leat álo rahpasat.

Oahppan sáhttá dáhpáhuvvat neahtas. Ollu **allaskuvllat ja universitehtat** fállit olbmuide neahta bokte oahpu. Dat lea buorre sidjiide geat áset guhkkin eret daid báikkiin dahje gávpogiin gos leat universitehtat ja allaskuvllat mat fállit iešguðetlágan oahpu. Sii sáhttet neahta bokte čuovvut oahpahusa, lohkat ja sá-gastit oahpaheddjiin.

Áviissat, TV ja eará mediat almmuhit nehttii odðiasiid dalán go dáhpáhuvvet. Dohko lea álki čalistit, filbmet dahje

muitalit ja juohkit dalán go lea dáhpá-huvvan. Olbmot sáhttet commenteret ja digaštallat ássiid ja odðiasiid mat alm-muhuvvojit nehttii.



ásahan álggahan

ruskaduvdnái doapparbáikái

logget searvat, mannat sisu

universitehtat ja allaskuvllat skuvla, dahje oahppobáiki gosa muhtimat álget go leat geargan joatkaskuvllas

Mánáid neahtta-njuolggadusat

- Láhtte vuohkkasit ja čábbát earáid vuostá interneahtas. Givssideapmi neahta bokte lea seammá duoðalaš go eará givssideapmi
- Jurdil ovdal go rabas neahttabáikkiin almmuhat persovnnalaš dieðuid iežat dahje earáid birra.
- Beassansáttni galggašii leat váttis árvidit. Beassansáttni lea áibbas priváhta.
- Muitte ahte lea álki gielistit neahtas, ale jáhke buot maid earát čállet ja muitalit.
- Jos áiggut deaivat olbmo geainna neahtas leat háleštan, de váldde fárrui muhtin rávis-olbmo geasa luohtát. Deaivva neahtta-olbmuin muhtin almmolaš báikkis.
- Botke oktavuða seammás jos vásihat juoidá mii ii leat nu vuogas. Dieðít neahttabáikái.
- Muital muhtin rávisolbmui dahje earáide geaidda luohtát, jos vásihat juoidá mii ii leat nu vuogas. Dieðít politiijaide jos leat duoðalaš ášsit. Ii leat du sivva, jos earát neahtas barget du vuostá juoidá mii ii leat nu vuogas.

.....

persovnnalaš dieðuid čujuhusa, nama
ja riegádannummira

almmolaš báikkis omd girjerádjosis
dahje káffestobus, bussestašuvnnas

botke heaittit, loahpat



Britt Elin Hætta Isaksen.

Britt Elin lea politiija ja diehtá ollu dan birra maid mánát ja nuorat vásihit iešguðet sosiála mediain ja eará neahttaservodagain. Mii leat jearahallan su dan birra.

Makkár neahttaservodagaide oassálastet nuorat áinnas?

Nuorat liikojit leat eará nuoraiguin ovttas, nu ahte sii servet áinnas sosiála neahttaservodagaide. Dat leat neahttaservodagat gos sii sáhttet deaivvadit, humadit ja speallat eará nuoraiguin. Sii sáhttet govard, filmmaid ja suohtasiid lonuhallat. Dat lea buorre vuohki deaivvadit ja gulahallat earáiguin, jos ii heive mannat guossái. Dat lea maid buorre vuohki doalahit oktavuođa singuin geat orrot guhkkin eret, go sin ii leat vejolaš deaivat ja oaidnit nu dávjá. Muhtimat ožžot ođđa olbmáid sosiála neahttaservodagain.

Gávdnojit go sierra neahttanjuolggadusat?

Dábálaš olmmošvierut ja láhtten-njuolggadusat gusket maiddái neahttaservodagaid oassálastimii. Nu go dábálaš servodagas, de maiddái neahttaservodagain ovttastallet ja deaivvadit ollu olbmot. Mii dovdat ja máhttit dábálaš servodaga láhtennjuolggadusaid, muhto eat álo muitte ahte dábálaš olmmošvierut ja láhtennjuolggadusat gusket maiddái neahttaservodagaide.

Eanaš neahttaservodagat leat ásahan neahttanjuolggadusaid. Jos olbmot eai čuovo neahttanjuolggadusaid ja dábálaš olmmošvieruid neahttaservodagain, de sii **biddjojit eret** doppe.

biddjojit eret lihcojuvvojít

Leat go duodat buot mat neahtas čužžot?

Eai leat. Nehttii sáhttá juohkehaš čállit ja almmuhit vaikko maid. Danne lea dehálaš muitit ahte ii soaitte leat álo riekta ja duohtha buot mii doppe čuožžu. Dat mearkkaša mii galgat **kritihkalaččat árvvoštallat gálduid** ja dieduid maid mii lohkat ja gullat neahtas.

Manne lea neahtagivssi-deapmi earálagan go dábalaš givssideapmi?

Neahtagivssideapmi dáhpáhuvvá neahtas. Cuiggodeapmi, gohčodeapmi, **áitin**, olgušteapmi ja **sealggeduohkin** kommenteren dáhpáhuvvá sosiála neahttaservodagain. Dat sáhttá leat ollu garraseabbo neahtas go duohtha eallimis danne go givssidit neahtas lea álkkit go givssidit dábalaččat. Lea álkkit nuppi čálalaččat cuiggodit go njuolga dadjat. Son gii givssiduvvo, ii sáhthe oaidnit maid givssideaddji rumašgiella ja geahčastagat muitalit. Datte lea nu ahte fasttes sánit sordet ja bávččagahttet nuppi seammá garrisit, dáhpáhuvaš dal njálmmálaččat vai čálalaččat. Čálalaš cuiggodeapmi ja áitin bissu das čalmmiid ovddas. Dat ii jávkka.

Maid galgá bargat jos neahtagivssideami vásicha?

Neahtagivssideami galgá dieđihit rávisolbmuide, dahje politijaide jos dat ii noga. Son gii givssida, berre diehtit ahte neahtagivssideami sáhttá guorrat ja duodaštit, ja ahte politijat sáhtet gávnnahit gii dan lea dahkan, jos vel lea ge čiehkan iežas identitehta. Son gii givssida, sáhttá ránggáštuvvot.

Dihtet go...?

...ahte váhnemiin lea vuogatvuotta geahččat ja čuovvut maid don čálát, dajat ja almmuhat earáide sosiála neahttaservodagain.

kritihkalaččat árvvoštallat dárkilit árvvoštallat

gálduid son gii lea álmmuhan nehttii dieđu **sealggeduohkin** hállat ja árvvoštallat eará olbmuid, nu ahte sii eai dieđe dan.

áitin baldin

Čoahkkáigeassu

Mat leat neahttaservodagat?

Neahttaservodagat leat servodagat mat gávdnojít ja doibmet interneahdas. Daidda mii sáhttit oassálastit goas heive ja go mis lea dihort, mátketelefovadna, Ipad dahje eará IT-ávnras mas lea neahtta.

Iešgudet neahttaservodagat

Gávdnojít iešgudet neahttaservodagat. Dábáleamos leat sosiála neahttaservodagat, bloggen, gálvooastin ja -vuovdin, báñkkut, leksikonaat, skuvllat ja mediat.

Mo heive láhhttet neahttaservodagain?

Neahttaservodagain heive láhhttet nu mo dábálaš servodagas. Dábálaš olmmošvierut ja láhhtenvuogit doibmet maiddái neahttaservodagain. Eanaš neahttaservodagat leat ásahan njuolgga-dusaid das mo láhhttet. Jos olbmot eai čuovo daid, sáhtta neahttaservodat sin gieldit geavaheames neahttaservodaga ja giddet sisabeassama. Neahtagivssideami galgá dieđihit politiijaide, jos dat ii nogá.

The screenshot shows the NRK Sápmi homepage. At the top, there's a navigation bar with links for NYHETER, SPORT, TV, RADIO, DISTRIKT, and a search bar. Below the navigation, the main content area has two columns. The left column features a large image of a painting titled "Sámi dáidda 40 lagi čáđa čájehuvvo Guovdageainnus". Below the image is a caption: "Ikte lea Guovdageainnu gillájus rahpoon Sámiid Vuorka-Dávvirid 40 lagi ávvočejáhus." The right column has a section titled "MÁGASIIDNA" with a portrait of a woman in traditional Sami clothing. Below the portrait is the text: "Sámiide galggašii maid lávdi" and a short description in Sami. Further down, there are two smaller images: one of a man labeled "Bissehit álbtomteahci" and another of a bird labeled "Mannjidis giidda marjonahtii čuoikka".

Ohcci

Loga čoahkkáigeasu s. 64 ja vástit.

1. Mat leat neahttaservodagat?
2. Mo sáhttit mii oassálastit neahttaservoda-gaide?
3. Makkár neahttaservodagat leat dábá-lepmosat?
4. Mo heive láhttet neahttaservodagain?

Dahkki

1. Mana neahttiidiui: dubestemmer.no ja vállje sámegiel oasi. Doppe sáhtát lohkat eambbo neahttageavaheami birra. Geavat dieđuid maid dán neahttiiddus gávn-nat ja logaldala earáide ceahkis eambbo dan birra mo neahta sáhttá oadjebasat ja jierpmálaččat geavahit.
2. Mii lea du beroštupmi? Maid don liikot bargat astoáiggis? Ásat mahkáš muhtin neahttiiddu gos olbmot sáhttet oastit du gálvvu, dahje lohkat du beroštumiid bir-ra. Daga logo ja hábme dan nu ahte olb-muide šattašii miellagiddevaš logadit du neahttiiddu. Dán sáhtát dahkat neahtas, almmutkeahttá.

3. Dahkket blogga das go duddjobehtet dah-je bargabehtet juoidá skuvillas. Čilgejehket duoji ja barggu, ja govvejehket ja almmu-hehket internehtti.
4. Geahčadehkvet muhtin bloggaid. Man birra sii čállét? Leat go olbmot kommenteren?

Dutki

1. Guorahallet makkár neahttaservoda-gaide du luohkkáskihpárat oassálas-tet dávjjimusat ja eanemusat. Dahk-kec čuoldadiagrámma ja ovdanbuktet ja digaštallet bohtosiid ceahkis.

GEOGRAFIIJA

Dán oasis oahpat

1. Mo min eatnamat šadde
2. Mo kártta lohkat ja mo dainna bargat
3. Norgga fylkkaid birra





*Eanan
Eadni
Beaivi
Báris*

*Ja riegádii dolla
Arvi arvvii
johkan, jávrin
Sugadii bieggä
šuohkihii mearra
Runodii geađgeduottar
máraidii*

*Deike
almmi alihii
oanehis geassái
cizážat vizarde
sámit
biekka bossumat ámadajus*

Nils Aslak Valkeapää



Ålesund

Geografiija – čilget eatnama

Geografiija lea oahppa olles máilmme birra. Geografiija lea greikkalaš sátni ja mearkkaša *čilget eatnama*. Jos gal-gat máhttit čilget eatnama, de fertet máhttit ollu ođđa sá-niid ja namahusaid. Daid sániid geavahit go áigut muitalit ja čilget ábiid, váriid, jogaid, jávrriid, eatnamiid, gávpogiid ja báikenamaid.

Geografiijas oahppat mo eatnamat leat šaddan nu mo dat otne leat. Oahppat maiddái dálkkiid ja dálkkádagaid ja luonddu birra. Oahppat kárta lohkat ja dainna bargat lea dehálaš oassi geografijsaahpus. Geografiija oasis oahppat maiddái gos olbmot áasset ja mo sii birgejít doppe gos áasset.


Go mii geografijsain bargat, de mii vástidit gažaldagaid.

- **Man allat lea várri?**
- **Gos lea gávpot?**
- **Makkár eanadat lea dien riikkas?**
- **Manne lea eanadat šaddan ná?**
- **Gos leat stuorra jávrrit?**
- **Gos orrot eanemus olbmot?**
- **Mo birgejít olbmot?**
- **Makkár resurssat gávdnojit guovllus dahje riikkas?**
- **Gos leat alla várít?**

geografiija čilget ja buohtastahttit báikkiid ja guovlluid


eanadat makkár luondu/eana lea dábálaš dihto guovllus, omd. vuotnaeanadat dahje duottareanadat

resurssat luondu-ávdnasat, omd. guolli, boazu, vuovdi, dahje silba dahje ruovdi



1. Mo min eatnamat šadde

Čuonjáváaggi Ruotabeal Sámis.



Dán oasis oahpat

- Mii jiekŋaáigi lea
- Mii jiehkki lea
- Mo jiehkki šaddá
- Goas maŋimuš jiekŋaáigi nogai
- Mo jiehkki lea hábmen min eatnamiid



Sápmi lea min iežamet guovlu. Dat lea guhkkin davvin máilmis ja orru siskkimuččas Eurásia eanapláhta alde. Danne eai leat eanadoarggástusat ja vulkánat Sámis. Sámis lea guhkes **riddu**. **Rittuguovlluin** leat sihke sullot, njárgat ja vuonat maid jiekŋaáigi lea guhkesáiggi badjel hábmen. Sámi alla várit ja gáissát leat šaddan daid áiggiid go eanapláhtat nordašuvve oktii. Dan áigge ledje Sámi várit seammá alladat go Himalaya várit. Biekkat, jiekŋa ja arvi ja muohta leat golladan váriid nu ahte dat eai leat šat nu alladat.

Go muohta ii geargga suddat geasis, ja deddojuvvo čoahkkái jagis jahkái, de šaddá muohta jiekŋan. Jiekŋa stuorru ja **assu** jagis jahkái, ja loahpas šaddá **jiehkkin**. Jiehkki lea dat stuorrra assás jiekŋa mii govčai eatnama.

Sullii 20 000 lagi dassái lei olles Sápmi jiehki vuolde. Dát jiehkki, mii muhtun sajiin lei máŋga kilomehtera asu, **háb-mii** min eatnamiid. Áiggiid čađa leat leamaš ollu **jiekŋa-áiggit**.

Giebmegáisi/Kebnekaise
lea ruotabeale Sámi alimus
várrečohkka. Dat lea 2106
mbá allat. Várrečohkka lea
oassi várreráiddus mii šattai
go eatnamat nordašuvve ok-
tii. Dát várrečohkka dahká otne
ráji gaskal Ruota ja Norgga.

riddu mearragáddi
rittuguovlluin mearra-
gátteguovlluin
assu šaddá asit
jiehkkin stuorra , viid-
dis jiekŋa. Oasi jiehkis
mii gohčodit jiekŋan.
háb-mii ráhkadii
jiekŋaáiggit áigi goas
jiehkki govčai eatna-
ma
mbá mehtera bajá-
bealde áhpedási

Eana loktanii

Manjá manimuš jiekŋaáiggi dáhpá-huvai juoidá maid mii gohčodit *eana-loktaneapmin*. Stuorra assás, lossa jiehkki suddagođii, jiehkkekedeaddu geahpui ja eana loktanii. Mearra **ahccái**, muhto eana loktanii vel eambbo. Dás-si masa mearra ollii dalle go jiehkki sut-tai, gohčoduvvo **marina rádjin**. Dat lea mealgat bajábealde otná mearradási.

Mii sáhtášeimmet eanaloktaneami čáje-hit dán láhkai: Mii deavdit veaháš čázi

glássa lihttái vai buorebut oaidnit mii dáhpáhuvvá. Dohko bidjat svámppa, ja danala fas jiekŋačoaltru. Mii oaid-nit ahte **jiekŋačoaltu** deaddá svámppa čázevuollái duolbbasin. Jiekŋa sudda-gohtá ja dađis maid geahppu. Dalle oaidnit ahte svámpa loktana. Juste dan seammá dahká eana maiddái. Go jiehk-ki suddagođii, de eana loktanišgodii. Dan dahká vel otne ge, muhto dat dáhpáhuvvá nu **sivvadit** ja njozet ahte mii eat **vávjje** dan. Muhtin sajiin lokta-na eambbo go eará sajiin.

• • • • • • • • • • • •
ahccái loktanii, lassánii
mearračáhci

marina rádjin mearra-rádji

jiekŋačoaltu oassi stuorát
jieŋjas

sivvadit veahážiid mielde

vávjje fuomáš

glássa láse

Stuorragurra Mázes. Dutkit jáhkket ahte gurra šattai go eana loktanii jiekŋaáiggiid manjá. Gurra lea 8 miilla guhku ja čiekŋalepmosis 8 mehtera čieŋal.



Eana ii leat loktanan álo seammá ollu. Ollu báikkiin sáhttit geahčadit ovddeš mearragáttiid mearkkaid. Mearkkat čájehit gokko áiggiid čađa leat leamaš mearragáttit. Daid mii gohčodit **gáddelinnján**. Dát mearkkat šadde go jiehkki suddan bisánii muhtin áigái. Dađe mielde go jiehkki sutta ja eana loktanii fas, báhce gáddelinnját **mealgat** bajábeallái otná mearradási.

Gálldašjoganjálmmis Buolbmátjávrris Davvi-Suomas sáhttit čielgasit oaidnit gáddelinnjáid. Muhtimat dain leat 80 **mbá**.



Čázeoaivi birrasii jagi 13 000 dassái.

Čázeoaivi birrasii jagi 10 000 dassái.

Mo jiehkki bargá

Jiehkki ii dušše oro jaska ja leabbá eatnama alde. Dat golgá dohko gosa lea **mihtolat**, muhto dat dáhpáhuvvá nu sivvadit ahte mii eat **vávjje** dan. Golggadettiin dat **luvve** sihke stuorra ja smávva gedđgiid. Muhtimin sáhttá stuorra gedđgiid cuvket sáton. Geadđgit ja sáttu čuvvot jiehkki dađis go dat johtá. Dáid gedđgiid mii gohčodit **morenan**.

.....

gáddelinnján linnját mat čájehit gokko gáttit leat leamaš

mealgat ollu

mbá mehtera bajábealde áhpedási

mihtolat vulos luohkká

vávjje fuomáš

luvve luovusin dahká




Dás oaidnit mo jiekja hoigá eatnama ja gedđgiid látnan.

Jiehki viidodat

Guovllut gos mii dál ássat, leat leamaš jiehki vuolde. Sullii 12 000 jagi dassái suittai stuorra oassi jiehkis. Jiekŋaáigi nogai, eana loktanii ja mearragáttit šadde. Dušše **siseatnamat** ledje ain jiehki vuolde. Dán áiggis báhce ollu morenat Sis-Finnmárkui. Dat dagahedje bárrolágan eanahámiid ja duoddariid. Muhtin dáid báruid gaskii báhce jienjat suddat. Daid mii gohčodit otne jávrin.

siseatnamat guovllut mat leat guhkkin eret mearragáttis





Bárrolágan duovdagat ja jávrrit. Čorgažis/Nordkyn Finnmárkkus.

7000 lagi dassái lei Davvi-Eurohpás ollu lieggaset **dálkkádat** go otne. Jiehkki lei suddan miehtá Davvi-Eurohpá. Go liegga dálkkádat nogai, de šaddagohte fas jiehkit muhtin guovlluide. Muhtimat dain leat Norggas. Stuorámus lea Čáhppesjiekki/Svartisen Nordlánndas. Finnmárkku ja Romssa stuorámus jiehki lea Ákšovuonjiekki/Øksfjordjøkelen.

.....
dálkkádat dábálaš dálki



Ákšovuonjiekki/Øksfjordjøkelen.

Jiehkki mearkkat luond-dus

Jiehkki, dahje jiekŋááigi lea guođđán čielga mearkkaid lundai. Daid sáhttit ain otne oaidnit.

Leagit ja vákkit leat jiekŋáigge-mearkkat. Muhtin leagit leat šaddan U-hápmásažžan go jiehkki lea johtán ja golgan leagi mielde gitta áhpái. U-leagis lea duolba bodni. V-leagis lea V-hápmi. Dat lea šaddan V-hápmásažžan go johka lea borran iežas ain vuolle-lii. Dábálaččat mii gohčodit daid ávžin. Vákkit leat duoddaris ja dain lea U-hápmi.



U-leahki, Anastølsvatnet.



V-Leahki Nuvvosis Ohcejogas.

Morenat leat gead̄ggit ja sáddot maid jiehkki lea luvven bávttiin ja jođidettiin fievrriðan mielde. Go jiehkki suttai, de báhce gead̄ggit dasa. Gávdnojit guovtteleagan morenat. *Geahčemorenat* leat dievát, čorut ja dearpmiit maid jiehkki lea hoigan ja guođđán dasa látnan go suttai. *Vuođđomorenat* leat gead̄ggit ja sáttu mat ledje jiehki vuolde go dat suttai.

Jiehkkesirdonbákti lea stuorra gead̄gi maid jiehkki lea sirdán eret das gos álgus luovvanii.



Vuođđomorenat Rástegáissás.



Geahčemorena.




Jiehkkesirdonbákti.

Skuvrensárgát leat sárgát lássás dahje bávttis. Dát čájehit guđe guvlui jiekŋa lea johtán das. Sárgát šadde go sáttu ja geadđgit leat skuvrejuvvon lássá vuostá jienja jođidettiin.

Jorba geađggit čájehit maid jiekŋaáiggi doaimmaid. Geadđgit leat leamaš jiehki vuolde ja leat jorran ja čuvvon jiehki lihkastemiid máŋgaid duháhiid miljovnnaid jagiid. Dán láhkai dat leat ožzon jorba hámi. Maiddái čáhci sáhttá **jorbet** gedđgiid. Jiehki vuollái šadde jogat go dat suddagođii. Dat maid ledje mielde hábmemin jorba geađggiiid.

.....

jorbet dahkat jorbbasin



Govas oaidnit ahte šaddet jogat jiehki vuollái go dat suddá. Jogaid mielde jorret geadđgit. Geadđgit šaddet jorbadin go leat jorran máŋgalot duháhiid jagiid jogain, jiehki vuolde.



Vuotna.



Skuvrensárgát.



Jorba geađggit.



Assás jiehkki.

Jiekŋaáigi

- Jiekŋaáigi lea dat áigi goas stuorra, assás jiehkki govčai eatnama.
- Jiehkki lea muohta ja jiekŋa mii ii leat suddan, muhto čoahkkanan ja áiggiid čađa sturron ja losson.
- Jiehkki suddagodžii go šattai lieggaset dálkkádat.
- Eana loktanii, ja jiehkki hábmii min eatnamiid nu mo dat otne leat.
- Leagit, lássát, vákkit, duoddarat, várit, čorut, čievrrat, jávrrit, jogat ja dearpmít leat luondduovdagat maid jiehkki lea hábmen.
- Mii sáhttit luonddus oaidnit ja geahčadit mearkkaid jiekŋa-áiggis.
- Muhtin sajiin máilmvis leat ain jiehkit.

Ohcci

Oza teavsttas vástádusaid čuovvovaš gažalda-gaide!

1. Mii lea jiehkki?
2. Mo šaddá jiehkki?
3. Man assái sáhtii jiehkki leat?
4. Maid barggai jiehkki?
5. Mii dáhpáhuvai manjá manjimuš jiekŋaággi?
6. Mat čuvvot jiehki go dat johtá?
7. Goas nogai manjimuš jiekŋaággi?
8. Namut guokte jiehki maid otne ain sáhttít geahčadit!
9. Namut golbma iešguđetlágan mearkka mat čájehit mo jiehkki lea bargan ja hábmen eatnama!

Dahkki

1. Párrabargu: Čájeheahkki earáide mo eanaloktaneapmi lea dáhpáhuvvan, ja čilgejehkki dárkilit. Dárbbašeappi glássalihti, čázi, svámppa ja jiekŋačoalttu. Lohkki s. 73 mo dan sáhttá čájehit ja demonstreret earáide.
2. Iskat olgun mo geahčemorenat leat šadan: Olgun sáhttá juoidá hoigat sáddos. Go bisána, de oaidná ahte sáttu mii lea hoiga-duvvon, lea báhcán látnan ovddabeallái.

Dutki

1. Plánejehket mátkki man ulbmil lea fuomášit, dutkat ja ságastallat ja digaštallat jiekŋaággi mearkkaid luonddus.






2. Kártaoahppa

Dán oasis oahpat

- Mii kárta lea
- Mo lohkat ja áddet kártta
- Iešguđet geografalaš hámiid birra
- Mii globus lea
- Mii atlas lea
- Almmiid hálttiid



Kárta

Dán gova lehpet jáhkkimis dii boahkat oaidnán TV:s. Dát lea nu gohčoduvvon *dálkekárta*. Dán kártaas oaidnit muhtin báikkiid Sámis ja makkár dálki dohko lea dieđihuvvon. Kártaas oaidnit báikenamaid ja makkár temperaturvrat doppe šaddet. Lassin oaidnit dálkesymbolaid nugo balvaid, beaivvadaga, arvvi ja guđe guovllus biegga bossu.



Mii lea kárta?

Kárta čájeha tevdnejuvvon oasi eatnámis, gehčcon bajábealde. Dát oassi lea sakka unniduvvon duohtavuoða ektui.

Kárttas lea dábálaččat mihttu mii muitala duohtavuoða sturrodaga kártta sturrodaga ektui. Ovdamearkka dihte sáhttá 1 cm kárttas leat 10 m duohtavuoðas. Dalle lea **mihttolávva** 1:1000. Kárta maid eatnašat dovdet, lea kárta spábbachiekčanšiljus. Das oaidnit čielgasit šilju ravddaid, gokko moalat leat ja eará osiid.

Go galgá kárttain bargat, de lea vuogas geavahit gova veahkkin. Dalle sáhtát bálddastahttit govvaduohtavuoða kárttain.

Geahča dán gova mii lea váldon áim-mus muhtin skuvlašiljus. Govas oain-nát bures mat das ledje dan beaivvi go govva váldui. Tevnnet gurut bealde, mii lea kárta, čájeha juste dan seammá. Maiddái dat čájeha bajábealde. Kártii leat visstt, sáttolánat ja bálgát tevdnejuvvon symbolaiguin. Mii dadjat ahte kárta lea álkiduvvon. Dasa eai tevdnejuvvo olbmot dahje biillat, go dat eai leat gitta dahje bistevaččat das.

Sihke kárta ja govva leat unniduvvon. Skuvlašillju ii livčče dán siidui čáhkan jos ii livčče unniduvvon. Kártta bajágeahči lea álo davás.

mihttolávva muitala mihttoerohusa mihtus kárttas ja mihtus duohtavuoðas. Omd. 1:1000 okta centemehter kárttas lea 1000 centemehter luonddus. 1000 cm lea seamago 10 mehter.

Tevdnet kártta

Kárta lea tevnnet **eanađagas** mii lea gehčcon bajábealde. Kártii galget čáhkat ollu dieđut smávva sadjái. Maid ferte kártatevdnejeaddji dalle bargat?

Álkidit

Tevdnejeaddji ii sáhte váldit mielde buot maid son oaidná go áigu tevdnet kártta. Son ferte álkidit, sivas go ii leat sadji tevdnet buot maid oaidná. Dalle ferte son guođđit muhtin dieđuid mat eai leat nu dehálačcat.

Unnidit

Dinggaid maid son áigu tevdnet kártii, ferte son unnidit ollu eambbo go mii duohtauuođas lea. Dalle lea kártatevnnet mii čájeha eanadaga, sihke álkiduvvon ja unniduvvon. Jus smiehtat máilmmekárta birra, de smiehtat man ollu dat lea unniduvvon ja álkiduvvon vai olles máilbmái lea sadji kártii.

Symbolat ja ivnnit

Tevdnejeaddji geavaha maiddái **symbolaid** ja ivnniid sániid sadjái. Okta smávva symbola sáhttá muitalit ollu ovttá kárta dahje maiddái ivdni muitala fas eará. Kártii leat dávjá tevdnejuvvon symbolat mat muitalit maid iešguđet symbola dahje ivdni mearkkaša.

Muhtin symbolat kárta


Kárta lea muhtinlágan giella, kodagiel-la. Kárttas leat ollu smávva tevnnegat dahje symbolat mat muitalit ollu lassi dieđuid daid birra mat doppe gávdno-jit. Go mii galgat kártta lohkat, de fertet dovdat kodaid maid tevdnejeaddji lea geavahan.

Kártii lea maiddái merkejuvvon gos davvi lea. Dábálaččat lea davvi kártaas álo bajimučcas. Eai buot kárttain leat seammalágan kodat, muhto dát leat muhtin ovdamearkkat:




eanađagas luondduguovllus/eanahámis
symbolaid govaid dahje mearkkaid

1.




1. Dás lea suolu tevdnejuvvon. Oaidnit duše čázi/meara alihin sullo birra.

2.



2. Dás leat **allodatsojut** tevdnejuvvon. Dat muitala man ollu eana badjána juohke sárgá gaskka.


3.



3. Lassin dásá lea suolu tevdnejuvvon mii lea gehčon siiddus. Dát ii leat kártaas tevdnejuvvon, muhdo dásá biddjon vai oaidnit sullo sihke bajábealde ja siiddus. Mii oaidnit bures go allodatsojut leat lahkalagaid, dakko lea várri ceakkus. Go allodatsojuid gaska lea guhkit, de lea dákko njoidosat dahje duolbasat.

Allodatsojut leat sárgát kártaas mat čájehit gokko eana šaddá alladeabbon, omd. gokko leat čorut, dievát, luohkát ja alla várít. Mađe unnit gaska sárgáin, dađe ceaggut.

4.




4. Dál lea kárta gárvis sullo badjel. Oaidnit man allat várri lea, oaidnit jávrri ja man galle mehtera lea bajábealde mearradási, oaidnit joga, bálgá, girku, geainnu ja moadde stobu mearragáttis.



Kártatevdnejeaddji ferte eanjkalastit ja unnidit go áigu kártaa tevdnet. Ferte maiddái tevdnet kártaasymbolaid.

Kárta lea tevnnet eanadagas mii lea

- gehčon bajábealde
- eanjalaston
- unniduvvon
- davvi bajábealde





Ivnnit čájehit erohusaid

Kártta ivnnit čájehit erohusaid. Ivnnit muitalit juoga allodagaid ja eatnamiid birra.

- Meara sevdnesalit ivdni muitala gokko lea hui čienjal. Fertet gal fuomášit ahte eai buot kárttain leat seammalágan ivnnit. Ovdal go dutkagoahtá kártta, lea dábálaš oahpásmuvvat kártta ivdnečilgehusaide.

Geográfalaš hámit

Go mii hállat eatnamiid ja riikkaid birra, de mii smiehttat mo diet eana lea. Leat go dat duolba eatnamat, vai leat go doppe ollu várit. Maiddái **rittut** mui-talit mo eana lea. Ovadamearkka dihte leat Norggas ollu vuonat ja sullot. Go mii smiehttat Sámieatnama birra, de sáhttit dadjat ahte Sámis leat ollu duoddarat, oalle alla várit ja maiddái vuonat.

Geográfalaš hámiid maid mii gávdnat ovta eatnamis dahje riikkas, sáhttit juohkit stuorra hámide ja smávva hámide.

Stuorrá hámit

Dan oasi mii deaivvada mearain, mii gohčodit riddun. Norgga rittus leat ollu vuonat. Buot riddofylkkain leat vuonat Norggas. Olggobealde rittu gávdnat mii fas sulluid, smávit sulluid ja báktesulluid. Siseatnamis gávdnat mii fas stuorra vuvddiid, jávrriid, duodda-riid ja jogaid.



Vuotna ja jiehkki.



Duottar ja leahki.

rittut mearragáttit



Stuorrahámit

- suolu
- vuotna
- várri
- duottar
- leahki
- jiehkki
- jávri



Njárga ja sáttogáddi

Smávva hámit

Stuorra hámiin sáhttit fuomášit ollu smávva hámiid.
Muhto ollu eará hámiide maid oaidnit, fertet geavahit
eará sániid. Dákkár sánit leat smávva hámit. Go mii
vuolgit mahkáš veaháš meahccái, de sáhttit vázzit bálgá
mielde dievá badjel, **rasttildit** ovta jogaža, ja de soaitit
joavdat ovta láddo lusa. Dievás sáhttit oaidnit viesuid,
dáluid, gusaid mat **guhtot** gittiin, ja bohccuid mat guhtot
jogašgáttiin. Sániid, nugo bálggis, dievvá, jogaš, láttu,
viessu, šibitdállu, giettit, kája, gohčodit mii geográfalaš
smávva hápmin.

• **rasttildit** vázzit dahje
johtit rastá
• **guhtot** borret suinniid



Jeaggi



Bálggis

Smávvahámit

- | | | |
|-----------|----------|-----------|
| • dievvá | • jogaš | • gieddi |
| • láttu | • čorru | • bálggis |
| • geaidnu | • jeaggi | • njárga |



Láttu

Mihttolávva

Nugo diehtit, de lea kárta sakka unniduvvon duohtavuođa ektui. Juohke kárttas lea mihttolávva mii muitala man ollu lea unniduvvon duohtavuođa ektui. Mii fertet diehtit mii **mihttolávva** lea. Kárttas čájehuvvo mihttolávva vuolimuččas. Ovdamearkka dihte ná:

Mihttolávva 1:15 000 000

1 cm kárttas = 150 km luonddus

Dábálašmátkekárttas oaidnit maiddái mihttolávva almmuhuvvon ná: Mihttolávva 1:50 000. Dát muitala ahte 1 cm kárttas lea 50 000 cm luonddus. Jus dán rehkenastit mehterin, de šaddá dát 1 cm kárttas 500 mehtera luonddus. Dát mihttolávva lea dábáleamos buot mätkekárttain maid mii geavahit go meahcis vadjolit. Nuppi siiddus mii bargat veaháš dáinna kárttain vai oahpásmuvvat dákkár kártaide.

**Mihttolávva muitala man
ollu kárta lea unniduvvon
duohtavuođa ektui.**




Mihtidit kárttas

Dás oainnát kárta mas lea mihttolávva 1:50 000. Mihttolávva dás muitala ahte 1 cm kártaa lea 500 mehtera duohtavuoðas, dahje luonddus.

Muhtin mánát leat vuoligimin skuvlamátkái Ruoššajávrái. Sii áigot idjadit doppe ja sii manet vácci biilageainnus Kentánis. Okta sierra joavku sis áigot dan seammás finadit lešvári alde, ja de mannat Ruoššajávrái duoddara mielde davás.

Mo galgá gávnahit man guhkki lea Kentánis Ruoššajávrái? Man olu guhkit šaddet sii vázzit geat áigot lešvári alde fitnat ja de easkka mannat Ruoššajávrái?

Gávnna vel ieš kártaa eará sajjid maid gaskka háliidat iskat.



0 1 2 3 4 km 1:50 000

Piera ja Márjá murjemin

- Piera, Piera, vuolgu dal murjet! Eadni lo-gai dán jagi leat ollu jonat ja sarrihat meah-cis, dadjá Márjá Pirii. Soai leaba joðus ruok-tot skuvllas.
- Hmm.. diet gal heive, vástdiit Piera ilus. – Muhto mun ferten vuos bihtáid bargat. Mis lea skuvllas dál kártta birra, ja mis leat ollu bihtát maid galgat ihttázii bargat!
- Juo, mus leat maid bihtát. Galláigge don leat geargan? jearai Márjá.
- Jákán diimmu geázes gal, muhto ferten borastit vel, jus moai vulge viða áigge?
- Juo, dat gal heive, dalle moai oaidnaletne min geahčen viða áigge! logai Márjá ja vá-zilii ruoktot guvli. Márjá orui meahcebeal-de veaháš guhkkelis go Piera. Márjá stobu rájes álggii stuorra vuovdi, ja doppe ledje ollu sajit gos lávejit buorit muorjesajit.

Márjá lei juo čohkkámin vearánda alde go Piera bodii vuoji sihkkeliiguin.

- Don leat juo gearggus? moddjái Piera Márjái. – Dus lea duoðaid miella murjet odne?
- De lea, mu mielas lea varas jokñameastu nu njálggat varas láibái. Áhči lea justa lái-bumin dál! Vuolgu dal! dajai Márjá.

Soai manaiga meahccái njolgélávkái bálgá mielde mii das stobu luhtte vulggii. Goap-pásge vel spánnja gieðas. Soai vácciiga muhtin áigge ja geahčaiga bovnas bovdni, muhto eai orron ollu muorjjit.

- Moai manne eret dán bálgás. Mun jáhkán duobbelis leat eambbo jonat go dás, logai Márjá.

Dalle soai earráneigga eret bálgás ja manai-ga siskelii vuovdái. Soai vácciiga bovnas bovdni, muhto eaba gávdnan ollu murjjiid gostege. Ja manaiga ain siskelebbui meahc-cái ja ozaiga murjjiid.

- Hei Piera, čurvii Márjá. – Boaðe deike, dápple leat ollu muorjjit!

Márjá viegai bovnas bovdni ja čájehii Pirii daid ollu jonaid. Son lei nu ilus go viimmat gávnnaiga murjjiid. Piera ja Márjá čokkiiga ángirit, go dás lei nu álki čoaggit, eaba dárbašan vázzit ja ohcat. Ii leange guhká ovdal go goappašat spánnjat ledje dievvan.

- Gal dás lei somá čoaggit, dajai Márjá, moddjái vel. – Livččiime galgan váldit nuppi spánnja vel mielde!
- Livččiime galgan, vástdiit Piera. – Muhto dás lea doarvái. Moai han sáhtte fas finadit eará háve. Dál moai gal njulgejetne ruoktot!

Piera ja Márjá vácciiga vuovddis, ja soai vácciiga. Ja eaba joavdan bálgá ala maid leigga guoððán. – Gáttátgo moai letne láhppon? jearralii Márjá Pieras. Márjá jiet-na measta doarggistii. – Hmm... ii livčče gal galgan leat ná guhkki gal báigái, logai Piera, ja lasihii: – Ja dál han vel lea obba-dálki, moai ean oainne gos beaivváš ge lea!! Dál lea diibmu guhtta, ja dalle lea beaivváš oarjin, čilgii Piera.

Márjá ja Piera čohkkáiga ja vikkaiga gul-dalit jienaid márkanis, muhto eaba gullan maidege. Ii gullon ii fal ii mihkkege!

- Mun gal jáhkán ahte bálggis lea duon guovllus, logai Márjá ja čujuhii.



– Moai sáhtte geahččalit, gal mun ge jáhkán ahte ferte leat dieppe guovllus, miedžihii Piera.

Dalle soai fas vázzileigga, muhto ii mihkege bálgáid boahtán sudno ovdii. Muhtin áigge geažes čurvii Piera: – Geahča, do lea gotkkabeassi!!

– Na maid de jus lea gotkkabeassi? jearialii Márjá.

– Dalle gal diedán gos máddi lea, vástidii Piera ilus.

– Manne dalle diedát, ii han dát leat go dábálaš gotkkabeassi? šuohkihii Márjá.

– Mun lean skuvllas oahppan ahte gotkkabeassi lea álo lulás, beaivváža vuostá! Dalle lea máddi duoppe! Iige diekko gosa moai

letne mannamin. De boade Márjá! Moai galge vázzit dooon vári vuostá, dalle bohte fas din stobu lahka, dajai Piera ilus.

Dalle go leigga vázzán muhtin áigge, de gávnnaiga fas bálgá ja fas dovddiideigga.

– Vuoi Piera, lihkus ledjet don dien oahppan skuvllas, muđui livččiime dál gal duođaid láhppon meahccái, dajai Márjá iluin.

– Gal don ledjet čeahppi Márjá, go fitnet joňaid čoaggimin. Lea duođaid njálgga varas meastu áhči varas láibái, logai eadni, go ledje borramin eahketborramuša gievknans.

– De gal sáhtát giitit gotkkabeasi ahte mis lea varas joknjameastu dál, dajai Márjá ja álgii muitalit mii lei dáhpáhuvvan.

Almmiháltit

Mis leat njeallje almmiháltti. Dat lea davvi (D), **lulli** (L), nuorta (N) ja oarji (O).

Beaivváš lea dábáleamos veahkki gávd-nat rivttes almmiháltti. Min guovlluin badjána beaivváš nuortan ja fas jávká oarjin.



Almmihálti muitala gos davvi, lulli, nuorta ja oarji lea.

Davvi – Nord – North

Lulli – Sør – South

Oarji – Vest – West

Nuorta – Øst – East

Almmiháltit almmiguovllut

Lulli ja máddi mearkkaša seammá. Muhtimat dadjet ja čállet lulli ja earát fas máddi. Dán girjjis mii leat válljen geavahit lulli.

Govas oaidnit nieddaža čuožžumin selggos beaivvi vuostá guovddáš beaivve. Dalle lea sus hárdu lulás. Su suoivva fas čujuha davás. Su gurut bealde lea dalle oarji ja olgeš bealde lea fas nuorta.

Eará vuohki gávdnat gos davvi lea, lea geavahit kompássa. Kompássa geavaha eanamagnetismma mii čájeha gos davvi lea. Kompássa magnetanjuolla čujuha davás, Davvipola guvlui.

GPS geavaha satelihtaid veahkkin čujuhit gos davvi lea. GPS:as lea alldis kárta ja kompássa. Dát čájeha justa gos don leat luonddus. Dát merke du "luotta" gokko leat vázzán, mahkáš geainnus muhtin jávrái. Go ruovttoluotta áiggut, de lea dušše čuovvut dán merkejuvvon luotta.

GPS rehkenastá guhká leat ádjánan dán gaskka ja galle kilomehtera leat vázzán.



Sateliitta



Kompássa



GPS-rusttet

GPS Global Positioning System

Globus


Globus lea jorbadas ja eatnama modealla. Globusii leat buot máilmimeoasit tevdnejuvvon. Dás sáhttit mii oaidnit gokko guhte máilmimeoassi lea nuppi ektui.

Olles globus lea juhkkon ruktofierpmá-dahkii. Dás gávdnat **gierdduid** mat leat **láskut** tevdnejuvvon, ja gávdnat gierd-duid mat ceaggut leat tevdnejuvvon.

Gierdduid mat leat láskut, gohčodit mii govdodatgierdun dahje govdodatgrá-dan. Gierddut mat leat ceaggut, leat fas guhkkodatgierddut dahje guhkkodat-grádat.

Govdodatgrádat

Globusas lea okta linnjá mii manná jus-ta gasku Davvipola ja Lullipola. Dát linnjá gohčoduvvo Ekváhtorin. Ekváh-tor lea 0-govdodatgrádas. Eará grádat mannet parallella ekváhtoriin, gitta 90 grádii, mii lea Davvipola. Oktiibuot leat 180 govdodatgráda. 90 gráda Davvi-polii, ja 90 gráda Lullipolii. Go mii áigut muitalit makkár govdodatgrádas muhtin báiki lea, de dadjat mii lea go lulábealde ekváhtora vai davábealde. Ovdamearkka dihte lea Romsa sullii 69 govdodatgráda davábealde ekváhtora.




Globus lea jorbadas, dego spábba, mii govve eatnama.

gierdu riekkis/sárggis

láskut horizontelaš

Govdodatgrádat



Guhkkodatgrádat


Globusas maiddái mannet linnját Davvipolas Lullipolii. Dáid linnjáid mii gohčodit guhkkodatgrádan. Dán álgit lohkát dan grádas mii manná Greenwich čađa ja dát gohčoduvvo nullameridiánan. Greenwich lea gávpotoassi Londonis, Stuorribritánnias. Dát lea maid juhkkon 180 grádii, 90 gráda oarjjabealde ja 90 gráda nuorttabealde nullameridiána. Ovdamearkka dihte lea Kárášjohka sullii 25 gráda nuorttabealde nullameridiána.

Atlas

Atlas mearkkaša *kárttat mat leat čohkkejuvvon girjin*. Atlasat sáhttet leat kárttat olles máilmmis, dahje oassi dušše das, omd. "Norgga Atlas". Dalle leat dušše Norgga kárttat doppe.

Kárttat atlasis leat juhkkon ruvttuide, nu ahte sáhttít gávdnat gokko muhtin báiki lea. Jos mii galgat "Skuvla kárta-girjjis" gávdnat Anárjávrri, de čuožžu registarisi ná: s 3 B15. Dát mearkkaša ahte mii gávdnat Anárjávrri kártagirjjis s 3, ruvttos B15. Geahča kárta siiddus 102–103. Dáinna lágiin mii sáhttít atlasis gávdnat buot báikkiid mat dohko leat merkejuvvon.


Guhkkodatgrádat



Atlas lea girji masa leat kárttat čohkkejuvvon omd. Sámi Atlas.

2 SÁPMI






Digitála kárttat

Digitála kárttat leat kárttat maid mii gávdnat neahdas. Dát leat elektruvnnalaččat ráhkaduvvon, muhto mii sáhttit daid maid čálihit báhpárii jus háliidit.

Digitála kártaas čálistit ohcansadjái báikenama maid mii háliidit gávdnat. Digitála kárta sáhttit stuorrudit dahje unnidit dađi mielde go lea dárbu. Dan sáhtát unnidit git-ta dan muddui ahte sáhtát gávdnat iežat dálu dahje din skuvlla. Digitála kárta sáhttá maiddái leat seaguhus kártaas ja satelihttagovas. Dalle leat omd. geainnut, báikenamat ja eará namanusat merkejuvvon govvi. Digitála kárta main-na lea vuogas ja álki bargat, lea: www.norgeskart.no



Digitála kárta www.google.no/maps

Gávdnat kárta

Geografija lea maiddái máhttit gávnahit gos báikkit ja riikkat gávdnojit. Mo galgat čilget gos Norga, Suopma, Ruošša ja Ruotta leat máilmis? Dalle fertet dutkat kárta dahje globusa, ja gávnahit man ektui lea vuogas čilget.

Jos mii geahččat globusis de oaidnit ahte dát riikkat leat oalle guhkkin davvin eanaspáppas. Danne lea ge dábálaš gohčodit daid Davviriikan.

Makkár mearat leat lahka ja birra Davviriikkaid? Mii dadjat ahte Norga lea Norggameara nuorttabealde ja ahte Ruotta lea Norgga nuorttabealde. Ruota ja Suoma gaskkas lea Mearrabađaluokta. Mearrabađaluokta dahká ráji Ruota ja Suoma gaskka. Suoma nuorttabealde lea fas Ruošša. Norgga lulábealde lea Davvimearra ja Dánmárku. Norgga ja Dánmárkku gaskkas lea Skagerak nuorri. Ná sáhttit joatkit čilgehusa dassá go leat Davviriikkaid čilgen buot mearaid, nuriid, luovttaid, rájiid, njárggaid, rittuid ja sulluid ektui. Geahččal čilget gos Sápmi lea.



Čoahkkáigeassu

- Kárta lea tevnnet eanadagas mii lea gehčon bajil.
 - Kárta čájeha eanadaga mii lea eŋkelaston ja unniduvvon.
 - Davvi, nuorta, oarji ja máddi/lulli gohčoduvvojít almmiháltin.
 - Mihttolávva muitala man ollu kárta lea unniduvvon duoh tavuođa ektui.
 - Ivnnit kárttas muitalit erohusaid, omd. allodaterohusaid.
 - Linnjáid Davvipolas Lullipolii gohčodit mii guhkkodatgierdun.
 - Gasku Davvipola ja Lullipola manná linnjá maid mii gohčodit ekvahtorin. Dat lea o-govdodatgráda.
 - Globus lea eatnama modealla
- Govdodatgrádat mannet láskut globusas. 0-govdodatgráda lea Ekváhtor.
 - Guhkkodatgrádat mannet ceag-gut globusas. 0-meridiána manná Greenwich čađa.
 - Atlas lea girji masa kárttat leat čohkkejuvvon.
 - Digitálakárta lea elektruvnnalaš kárta maid dihtoris oainnát.

Ohcci

1. Mii lea kárta?
2. Mo geavahuvvojit ivnnit kárttas čájehit iešguđetlágan eanahámiid?
3. Jus allodatsojut leat hui lahkalaगaid, lea go dákko njoiddus vai ceakkus?
4. Mat leat dat njeallje almmiháltti?
5. Mo sáhttá beaivváš veahkehit min gávdnat gos máddi/lulli lea?
6. Mii lea kompássa?
7. Maid muitalit kártamearkkat?
8. Mii lea globus?
9. Mii lea atlas?
10. Mat leat guhkkodatgrádat ja govdodatgrádat?
11. Mii lea mihttolávva?

Dahkki

1. Čilge nubbái mii lea kárta, ja mat leat dat njeallje dovdomearkka.
2. Tevdne kártta iežat luohkkálanja badjel. Vállje ieš mihttoláva.
3. Mana kártii siidui 102–103. Gávnna báikkiid dáppe ja čále báikkiid namaid iežat girjái. D8, C19....
4. Párrabargu. Vállje muhtin riikka globusis. Čilge nubbái gos máilmis dat lea. Nubbí galgá geahčalit du čilgehusaid vuodul gávnnahit man riikka birra don smiehtat. Lonuheahkki vuoru.

Dutki

1. Geavat Sámi Atlasa dahje Norges Atlasa. Gávnna makkár iešguđetlágan mihttolávat doppe leat. Čilge guđelágan kárttat leat tevdnejuvvon iešguđetlágan mihttolávain. Maid fuomáshit?
2. Tevdne ovtta dáin: iežat lanja dahje iežadet stobu birrasa. Makkár mihttolávva lei heivvolaš?
3. Vállje ja tevdne ovtta dáid kárttain: • iežadet ássan guovllu • iežat skuvlageainnu • iežadet valáštallan guovllu • buvdabirrasa gos dábálačcat gávppašeħpet • iežadet gárddi. Makkár mihttolávva dása lei heivvolaš?
4. Mana www.norgeskart.no. Dás ihtá kárta Norgga badjel. Váldde ja zoome báikki gos don orut ja de zoome dassái go gávnnat skuvllat. Čále unnimusat vihtta erenoamáš saji skuvlaguovllus maid don dovddat.
5. Mana www.norgeskart.no. Čále Elvebakk-en (Bydel) ohcansadjái. Man guhkki lea dás vázzit Álttá girdišilljui? Čále mehteriid dahje kilomehteriid.
6. Mannet olggos. Árvvoštallet ja namahehket din guovllu stuorra ja smávva geográfalaš hámiid.
7. Dán bargobihttái dárbbášat atlasa dahje globusa. Geavat dan maid leat oahppan govdodat- ja guhkkodatgrádaid birra, ja mearrit čuovvovaš oaivegávpogiid: 59°D 11°N. 40°D 116°N. 16°L 48°O Daga earáide ceahkis seammálágan bargo-bihtáid.

3. Norgga fylkkat



Stádda, Divtasvuodna




Dán oasis oahpat

- Man boaris Norga lea
- Makkar riikkaosiide Norga lea juhkkon
- Makkár fylkkaide Norga lea juhkkon



Norgga fylkkat



Norgga eanadat

Norga lea min iežamet riika. Dat lea guhkédáleš ja seaggi. Norga šattai 3000 miljovnna lagi dassái. Dat eana man alde mii vázzit, lea oktii šaddan čiekjalasas eanabajožis.

Várit ja várreráiddut šadde sullii 500 miljovnna lagi dassái. Dalle nordašuvaiga Eurásia eanapláhta ja Davvi-Amerihká eanapláhta oktii ja dát dagai máŋga duhát mehtera alla gáissáid ja váriid. Dasa lassin alla temperatuvara ja alla deaddu eatnama siskkožis maid dagahii váriid. Dan áigge ledje Norgga várit seammá alladat go Himalaya várit, muhto biekkat, jiekja ja arvi ja muohtha leat gollan váriid nu ahte dat eai leat dál šat nu alladat. Muhtin sajiin lea eana vudjon fas. Doppe leat dál guolbanat ja duolba eatnamat.

Norggas leat riddu, vuovddit, vuonat, duoddarar, leagit ja guolbanat. Buot dáid leat jiehkit ja eana-loktaneapmi hábmen. Norggas leat sihke buolaš dálvvit ja liegga geasit.

Norgga sáhttít juohkit 5 riikka-oassái ja 19 fylkii. Dán oasis beasat lohkät ja oahppat eamb-bo buot fylkkaid birra ja gos daid gávdná kárttas.

Riikkaoasit

- **Davvi-Norga**
- **Gaska-Norga**
- **Oarje-Norga**
- **Nuorta-Norga**
- **Lulimus-Norga**

Lulimus máttimus



Mo mii bargat fylkkain

Dán oasis mii galgat bargat fylkkain. Ovdabargun sáhttá leat ávkin čoavdit bargobihtáid nuppi siiddus.

Mii oahppat gos fylka lea, luonddu, sturrodaga, stuorra hámiid, eanadaga birra ja makkár **resurssat** doppe leat.

Dasto lohkut olbmuid ja servodaga birra. Man ollu olbmot ja gos fylkkas áasset, **ealáhusat, johtolat** ja kultuvra.

.....
resurssat juoga maid sáhttá ávkkástallat, omd. guolli, minerálat, olju, muorat

ealáhusat mii ráhkaduvvo dahje buvttaduvvo, dahje barggut leat

johtolat mo sáhttá johtit, omd. geaidnu, fearga, ruovdemáđđi, johka, bálggis

Lunddolaš gažaldagat LUONDDU birra sáhttet leat

- Gos riikkas lea fylka?
- Man stuoris lea fylka?
- Leago **rittus** vai siseatnamis?
- Gos gávnat váriid ja jávrriid?
- Mat doppe šaddet?
- Makkár **eanadat** lea fylkkas?

Lunddolaš gažaldagat OLBMUID ja SERVODAGA birra sáhttet leat

- Makkár ealáhusat gávdnojit doppe?
- Mainna barget olbmot doppe?
- Ollu olbmot áasset doppe?
- Gos sii áasset?
- Maid liikojit olbmot/turisttat doppe **galledit**?

.....
rittus mearragáttis

eanadat eanašlädja, eanahápmi, duovdagat, omd. várít, jávrrit, jeakkit, jogat, leagit, vuonat, ávžžit, gielltit, niittut, duolbbas, vuovdi, meahcci, duottar, geadgái

galledit geahččat/geahčadit

Ohcci

Geahčča kártta s. 110–111.

1. Makkár riikkaosiide juohkit mii Norgga?
2. Man ollu fylkkat leat Norggas?
3. Mii lea Norgga davimus ja lulimus fylka?
4. Mat leat du ránnjá fylkkat?
5. Guovtti riikkaoasis leat duše guokte fylka. Guđemuš riikkaoasit leat dat ja makkár fylkkat leat dat?
6. Goappá fylka lea davvelis, Sogn ja Fjordane vai Opplanda?
7. Guhte fylka lea davábealde Rogalándda?
8. Guhte fylka lea Telemárku nuorttabealde?

Dahkki

1. Galli fylkii leat rájit dáin fylkkain: Nordlánđa, Sogn ja Fjordane, Telemárku ja Oppland.
2. Makkár Norgga fylkkain lea sámi boazodoallu?
3. Čálit dán kártta (www.calliidlagadus.org/govat/doc/norga.pdf) ja čále namaid buot fylkkain Norggas. Ivdne fylkkaid iešguđet ivnniiguin dađi mielde go čálát.
4. Guovttis ja guovttis barget ovttas. Ráhkadeahkki gažaldagaid fylkkaid birra mat leat čállon girjjis. Unnimus 5 gažaldaga. Cálli ieža rivttes vástádusaíd daidda sierra báhpárii. Lonuheahkki gažaldagaid muhtin eará joavkkuin ja vástidehket.

5. Seammá joavku. Manni deike www.nrk.no/skole. Gávdni fylkkaid. Makkár fylkkain Lulli-Norggas gávdnabeahti sámiid birra filmmaid?

Dutkka iežat fylkka ja ránnjá fylkka

1. Mii lea erenoamáš iežat fylkkas. Veahkkesánit: Eanadat, ássan, ealáhusat. Čále dan birra. Oza govaid áviissain dahje eará čállosiin neahtas.
2. Guovttis ja guovttis barget fárrolagaid. Lohkki čállosiid iežade fylkka ja ránnjá fylkka birra girjjis. Nubbi ráhkada gažaldatkoarttaid (unnimus 5 koartta/gažaldaga) iežas fylkka birra. Vástádusa čálát koartta manjábeallai. Nubbi fas ráhkada ránnjáfylkka birra seammalágan koarttaid. Go leahppi geargan, de gažadeahkki nubbi nuppi daid fylkkaid birra!
3. Geavat interneahta! Oza galle luondu-suodjalanguovllu gávnnaat iežat fylkkas! Čále oanehaččat guovllu dovdomearkkaid, omd. lea go siseatnamis vai rittus.

FINNMÁRKU – Norgga stuorámus fylka

Finnmárku lea Norgga davimus ja stuorámus fylka. Viidotagas lea Finnmárku stuorát go Dánmárku ja badjel čuohte geardde stuorát go Oslo. Liikká ásset Finnmárkkus dušše sullii 75 000 olbmo, mii lea dat fylka gos ásset unnimusat olbmot.

Dáppe leat guhkes dálvvit ja oanehis geasit. Buollašeamos mii Norggas goasege lea mihtiduvvon, lei Kárášjogas 1886:s. Dalle lei $-51,4^{\circ}$ C. Muhto 1999:s

lei maid buolaš, dalle mihtiduvvui $-51,2^{\circ}$ C. Fylkkavearju lea tevnnet Várggáidladsnis, mii lea Várggáin, Finnmárku boarráseamos gávpot.

Finnmárkkus lea viiddis riddu ja dáppe leat 5 stuorra vuona. Dát vuonat leat Álttávuotna, Porsángguvuotna, Lágessvuotna, Deanuvuotna ja Várjavuonna. Finnmárkkus leat maid viiddis siseatnamat, ja Finnmárku-duottar lea **beakkán**.

beakkán dovddus eatnašiidda





Fylkka oaivegávpot Čáhcesuolu.

Rittu olggobealde leat maid stuorra sullot. Mähkarávju lea dovddus suolu, go doppe lea máilmmedovddus turista-báiki, Davvinjárga/Nordkapp. Stuorra sullot leat Sállan, Stierdná ja Fálá.

Finnmárkku rájit leat guovtti riikii, ja ovttá fylkii. Riikkat leat Ruošša ja Suopma, ja fylka fas lea Romsa. Stuorra jogat leat Deatnu ja Álttá/Guovdageaineatnu, ja goappašagat leat buorit luossajogat.



Ealáhusat ja ássan

Ovdal ásse finnmárkulaččat hui **biedgguid**, muhto maŋimuš áiggiid leat olbmot **fárrestaddan** eret smávva gilážiin stuorát báikkiide, nugo omd. Áltái, Hámmárfestii ja Girkonjárgii. Áltá lea báiki gosa eanemus olbmot leat fárren ja šattai gávpogin 2000:s. Dál orrot Álttá suohkanis sullii 19 000 olbmo. Áltá lea Oarje-Finnmárkku gávpe- ja skuvlaguovddáš. Hámmárfeasta lea dovddus go leat leamaš máilmimi dävimus gávpot ja lea dan sivas geasuhan ollu turisttaid. Stuorámus ealáhus lea **guolle- ja gássaindustriija**.

Mátta-Várjjat gielddas áasset eanemus olbmot Nuorta-Finnmárkkus. Girkonjárga lea stuorámus čoahkkebáiki. Stuorámus ealáhusat leat **bálvalus-**

ealáhusat, ruvkedoaibma ja suodjalus. Čáhcesuolu lea fylkka oaivegávpot gos lea Finnmárkku fylkkagielddahálddahus.

Rittus lea guolásteapmi stuorámus ealáhus. Báikkiin nugo omd. Bähcavuonas, Gángaviikkas ja Honnesvágis leat **guolásteapmi ja guolleindustriija** váldoealáhus. Sis-Finnmárkkus fas leat Kárásjohka ja Guovdageaidnu stuorámus báikkit ja viidodagas leat dát guokte báikki Norgga stuorámus gielddat/ suohkanat. Dehálaš ealáhusat dáppe leat boazodoallu, ollu almmolaš bargosajit ja **bálvalusealáhusat**. Kárásjogas gávdnat Sámediggegárdima ja NRK Sápmi. Guovdageainnus lea Sámi Allaskuvla. Deanus fas lea Sis-Finnmárkku Diggegoddi.

biedgguid sierra, iešguđet guovllus
fárrestaddan duos dás ain fárre muhtin
guolle- ja gássaindustriija industriija mii buvttada guoli ja gássa

bálvalusealáhusat bargit geat bálvalit earáid, omd. buvdabargit, oahpaheaddjít, dearvvašvuodđadivššárat

ruvkedoaibma luonddus viežżat ávdna- siid nu go ruovddi, veaikki ja golli

suodjalus militeara
guolásteapmi guollebivdu
guolleindustriija guollebivdu, guollefievrrideapmi, čollen, vuovdin, ja buot eará mii guoská guollebargui


bálvalusealáhusat omd. buvddat/ rámbuvrrat, divohagat, skuvllat, dearvvašvuodđadivššohagat



Muolkkuin/Melkøyas Hámmárfeasttas lea gássabuvttadeapmi. Gássa vurkkodit stuorra dánkkaid sisa dassái go skiippat vižzet dan. Muolkkut/Melkøya-gássa fievriduvvo miehtá máilmimi.



Guollebiebmanrusttegat Girkonjággas.



Finnmárku

- Sturrodat **48 615 km²**
- Alimus várri **Ákšovuonjehkki/Øksfjordjøkelen** 1204 mbá
- Stuorámus suolu **Sállan** 811 km²
- Guhkimus johka **Deatnu**, oktan **Kárásjogain, Iešjogain ja Anár-jogain**
- Stuorámus jávri **Iešjávri**
- Olmmošlohku (2013) **75 000**
- Gielldaid/suohkaniid lohku **19**
- Stuorámus gávpogat **Áltá, Hámmár-feasta, Čáhcesuolu ja Girkonjárga**
- Fylkka oaivegávpot **Čáhcesuolu**

ROMSSA FYLKA – nubbin davimus

Romssa fylkkas leat rájit Finnmárkku ja Nordlánnda fylkkaide, ja Ruttii ja Supmii.

Dákko gokko riikkarájít gaskal Suoma, Ruota ja Norgga deaivvadit, leat olbmot čohkken gedđgiid ja ráhkadan bo-riid. Go dás čuoččut, oainnát golmma riikii oktanaga. Ii oktage dieđe maid sátni Romsa mearkkaša, muhto muhtimat árvalit ahte sahttá leat "rávdnji dahje **leahttu** čázis". Romssas leat ollu sullot ja vuonat, ja dáid gaskka lea dávjá garra **rávdnji** go mearra **ahccá** dahje **coahku**.

• Romssa eanadat sakka molsašuvvá. Mearragáttis ja sulluin leat ceakko ja alla várit. Siseatnamis leat fas **gáissát** ja govda **leagit**. Várit Ivgus sulastahttet dovddus Álppaid Lulli-Eurohpás, go Ivgu várit leat čohkalat ja alladat.

.....
leahttu leaktu

rávdnji čáhci johtá/golgá
ahccá šaddá ulličáhcín

coahku šaddá fierváčáhcín
gáissát jorba várit

leagit vuomit



Ealáhusat ja ássan

Romssa stuorámus ja deháleamos **resursa** lea guolli mearas. Juo dolin ihte gávpogat ja čoahkkebáikkit dohko gos ledje buorit **hámmamat**. Davvi-Norgga stuorámus gávpot, Romsa, lei álggu rájes **gávpegávpot** gos maiddái válde vuostá guliid ja ledje sallitoljofabrikkat.

Sámit ásset miehtá Romssa fylkka, rit-tus gitta **siseatnamii**. Ollu sámi nuorat miehtá Davvi-Norgga bohtet Romsa-gávpogii studeret. Olmmáivággi lea šaddan dovddus RidduRidđu álgó-álbmotfestivála geažil.



resursa ávnnas maid sáhttá ávkkástallat, omd olju, guolli, boazu.

hámmamat vuogas báiki gosa stuorra skiip-paide sáhttá deavdit ja gurret gálvvuid.

gávpegávpot gávpot gos vuvdet ja ostet iešguđetlágan gálvvuid.

siseatnamii eatnamat mat, eai leat rittu dahje mearragátti láhka, leat siseatnamis.



Romsa

Sturrodat **25 870 km²**

Alimus várri **Jiehkkevárri** **1833 mbá**

Stuorámus suolu **Sážžá** **1586 km²**

Guhkimus johka **Geadđgesjohka/Målselva**

Stuorámus jávri **Áiddesjávri**

Olmmošlohku (2013) **161 690**

Gielddaid/suohkaniid lohku **24**

Stuorámus gávpogat **Romsa** ja **Harstad**

Fylkka oaivegávpot **Romsa**

NORDLÁNDA – guhkimus ja seakkimus

Nordlánda lea Norgga guhkimus fylka, badjel 50 miilla guhku. Nordlánnda juohkit mii dávjá viða oassái. Lulimus oassi gohčoduvvo Helgelándan. Davá-bealde Sáltoduoddara gohčodit fas Sáltun. Ofuohta-vuona birra fas gohčoduvvo Ofuohtan. Nannáma olggobealde lea fas Vestarális ja Lofuohta.

Sáltoduoddara bokte manná **smihton gierdu** maid mii gohčodit Polárgierdun. Davábealde dán gierdu oaidnit mii gaskaijabeaivváža geasset, ja dálvet fas vásihit dán linnjá davábealde **skábma-aiggi**. Dalle eat oainne beaivváža.

Nordlánnda eanadagas gávdnat buotlágan **eanahámiid**. Olggobealde rittu leat ollu sullot. Siskelis leat fas ceakko várit. Gasku Nordlánnda gávdnat mii Norgga nubbin stuorámus **jiehki**, namalassii Svartisen. Mearra lea álo leamaš dehálaš olbmuide Nordlánndas. Go riddu lea ná guhkki, de šattai mearra dehálaš **johtolahkan** ja bargosadjin.

.....

smihton gierdu oaidnemeahttun linnjá
skábmaáiggi sevdnjesáiggi
eanahámiid duovdagiid omd. bávttiid, mearaid, jávriid, vuvddiid
jiehki agálaš jienja
johtolahkan man mielde sáhttit johtit, omd. geaidnu, mearra, johka, bálggis



Ealáhusat ja ássan

Nordlánndas leat eanemus guolástead-djit Norggas. Miehtá Nordlánnda rittu leat coages **mearraviidodagat** gos leat buorit guolástansajit. Lofuohta lea dovddus giđđadorskebivddu geažil. Dalle boahtá **godđadorskí godđat** olggobeallái Lofuohta. Guolásteaddjít bivdet dalle issorasat dorski.

Nordlánna lea Norgga stuorámus **elrávdnjefylka**. Oassi dán elrávnnjis geavahuvvo industrijas nugo Mosseren/Mosjøen, Måehvien/Mo i Ranas ja Glomfjordas. Muhto Nordlánna vuovdá maid ollu elrávnnji Lulli-Norgii.

Sámit áasset Nordlánndas davvin gitta lulás. Davágeahčen Nordlánnda manná maiddái giellarádji gaskal davvisáme-giela ja julevsámegiela. Ja lulligeahčen álgá fas lullisámegiella. Divtasvuodna lea stuorámus báiki julevsámegiela guovllus. Árran julevsámeguovddáš lea Ájluovttas, Divtasvuona gielddas. Maajehjaevrie/Majavatn lea fas lullisámi báiki lillin Nordlánndas ja dán rájes álgá lullisámi boazodoallu.

mearraviidodagat mearraguovllut
godđadorskí dorski mii áigu godđat



Nordlánna

- Sturrodat **38 460 km²**
- Alimus várri **Oksskolten** **1916 mbá**
- Stuorámus suolu **linnásuolu/ Hinnøya**
- Guhkimus johka **Vaapstejeanuo/ Vefsna**
- Stuorámus jávri **Røssvatn**
- Olmmošlohku (2013) **240 527**
- Gielldaid/suohkaniid lohku **44**
- Stuorámus gávpogat **Bådåddjo, Måehvie/Mo i Rana ja Narviika**
- Fylkka oaivegávpot **Bådåddjo**

godđat luoitit meađđemiid
elrávdnji elektrisitehta



DAVVI-TRØNDDELÁGA – stuorra vuovddit

Davvi-Trøndelágas leat rájit Nordlán-dii ja Lulli-Trøndelágii, ja nuorttabelde fas Ruttii. Lullin gullá bealli Troandin-vuonas Davvi-Trøndelágii. Troandin-vutnii golgá maiddái Davvi-Trøndelága stuorámus johka, Nååmesje/Namsen. Dat lea dovddus ja buorre luossajoh-ka. Juohke geasi leat dáppe ollu **luossa-turisttat**.

Lea dábálaš juohkit Davvi-Trøndelága golmma oassái. Davimusas lea Nåå-mesjevuemie/Namdalén ja guovllut bir-

ra. Gaskkamuš oassi fylkkas fas gohčoduvvo namain Innherred. Dáppe gávdnat Steinkjer-gávpoga. Lulimus oassi fas lea Inn-Trøndelag ja dáppe ges leat Verdal ja Stjørdal stuorámus guovddážat.

Davvi-Trøndelágas gávdnat mii viiddis **láiráguovlluid** mat leat šaddan jieknaágis. Dávjá mannet láiráuđđasat dáppe.

luossaturisttat turisttat geat bivdet luosa **láirá** eana mii lea šaddan láirán, ja mii álkít golgagoahčit jos arvá ollu




Ealáhusat ja ássan

Davvi-Trøndelágas leat ollu buorit eatnamat ja **vuovddit**. Dan sivas leat eana-doallu ja vuovdebarggut dehálaš ealáhusat Davvi-Trøndelágas. Skognas gávdno okta Norgga stuorámus bábir-fabrikain. Frostas fas lea buorre dálki eanadollui. Doppe šaddadit boanddat **gortni**, buđehiid ja ruotnasiid.

Davvi-Trøndelágas ásset olbmot oalle **biedđgguid**, ja dan sivas eai leat ollu gávpogat ja čoahkkebáikkit. Steinkjer lea gávpot gos olbmot oalle biedđgguid.

Mii gávdnat lullisápmelaččaid miehtá Davvi-Trøndelága. Snåasenis lea Sae-mien Sijte, mii lea lullisámiid kultuvrra ja historjjálaš musea. Snåasenis lea maiddái lullisámiid skuvla, Åarjel-saemiej skuvle.



Davvi-Trøndelága

- Sturrodat **22 415 km²**
- Alimus várri **Jetnamsklumpen 1513 mbá**
- Stuorámus suolu **Otterøya**
- Guhkimus johka **Nååmesje/Namsen**
- Stuorámus jávri **Snåasenjaevrie**
- Olmmošloku (2013) **135 120**
- Gielddaid/suohkaniid lohku **23**
- Stuorámus gávpogat **Steinkjer ja Namsos**
- Fylkka oaiivegávpot **Steinkjer**

- **vuovddit** eana gos leat ollu muorat
- **gortni** gortnis mii dahkat jáffuid mainna fas láibut láibbi
- **biedđgguid** iešguđet guovllus, sierra, oktonassii



Orkanger

LULLI-TRØNDELÁGA - láiréeatnamat

Namma Trøndelága mearkkaša trøndáriid láhkaguovlu. Olbmot geat dáppe áasset, gohčoduvvojit trøndárin. Lulli-Trøndelága lea trøndáriid lulimus guovlu. Lillin fylkkas leat Dovre-várit ja nuortan Ruotaráji guovllus fas lea Sylene. Lulli-Trøndelágas lea nuortan rádjii Ruttii, ja muđuid leat rájit Davvi-Trøndelágii, Møre ja Romsdalii, Opplándii ja Hedmárkui.

- Lulli-Trøndelágas leat buotlágan **eana-dagat**. Dáppe leat riddu, sullot, vuonat, vuovddit, duoddarat ja duolba eana-doalloguovllut Troandinvuona birra. Boanddat ávkkástallet jiekjaágge láiréeatnamiid mat leat buorit eanadoallo-eatnamat ja šaddet bures. Fylkkas leat maid stuorra vuovddit.
-
- **eanadagat** duovdagat, eanahámit




Nidarosdomen Tråanten.

Ealáhusat ja ássan

Tråante/Trondheim lea Lulli-Trøndelága stuorámus gávpot. Dáppe orrot badjel bealli fylkka álbumogis. Tråanten/Trondheimas leat universitehta, teáhter ja museat. Eanemus dovddus huksehus lea **Nidarosdomen**. Bassi Olav lea hávdáduvvon gokko Nidarosdomen dál lea.

Ássan Lulli-Trøndelágas čuovvu legiid, ja ollugat ásset sulluin. Dáppe lea guolleindustriija dehálaš **birgenláhki**. Fylkka lullinuortan lea Plassje-duottar. Plassje-guovlu lea maiddái dovddus lullisámiid guovlu. Dáppe lea boazodoallu doaibmi eallinvuohki.



Lulli-Trøndelága

- Sturrodat **18 885 km²**
- Alimus várri **Storskrymten**
- 1985 mbá
- Stuorámus suolu **Hitra**
- Guhkimus johka **Orkla**
- Stuorámus jávri **Selbusjøen**
- Olmmošloku (2013) **305 446**
- Gielddaid/suohkaniid lohku **25**
- Stuorámus gávpogat **Tråante/Trondheim, Orkanger**
- Fylkka oaiivegávpot **Tråante/Trondheim**

• **Nidarosdomen** duopmogirku
• **birgenláhki** vuohki mo birget

MØRE ja ROMSDAL – fanas ja viessogálvu

Møre ja Romsdalis leat ollu sullot ja baskkes vuonat meara guvlui. Vuonaid siskkobealde leat baskkes leagit gos leat **goržejogat** mat bohtet alla ja ceakko váriin. Mii sáhttit juohkit Møre ja Romsdal golmma oassái: Sunnmøre, Nordmøre ja Romsdal.

Ealáhusat ja ássan


Møre ja Romsdal gávpogat leat huksejuvvon gávppašeami ja guolásteami vuodul. Ålesund, mii lea stuorámus gávpot, stuorui 1800-logus. Jagi 1825

- rájes 1900-logu rádjái stuorui gávpot 300:s gitta 12 000 ássi rádjái. Sivvan dasa lei sallitbivdu ja eará guollebivdu olggo-bealde rittu.
- Møre ja Romsdal ja Lulli-Trøndelága rádjeguovlluin lea lullisámi boazodoalu doaibmi eallinvuohkin.
- Olbmot Møre ja Romsdalas leat leamaš čeahpit álggahit fitnodagaid ja buvtta-demiid. Fylkkas gávdnojit **viessogálvo-industriija** ja fanashuksenindustriija ja

eará smávit industrijat. Ekornes viesso gálvofabrikkja lea okta daid dovdo-sepmosiid gaskkas. Åndalsnesas lea dovddus Trollveggen bákteseaidni mii lea 1000 m njuolga ceaggut bajás. Dát lea Davvi-Eurohpá alimus ceakkó bákteseaidni. Dovddus turistaguolu lea baskkes Geirangervuotna. Deike bohtet geasset ollu turistafatnasat, ja lea dan sivas okta Norgga eanemus galluvvon turistabáikkiin. Dás lea maiddái dovddus geaidnobihittá Trollstigen.



Sunnmøre



Møre ja Romsdal

- Sturrodat **15 114 km²**
- Alimus várri **Pytteggja** 1999 mbá
- Stuorámus suolu **Smøla**
- Guhkimus johka **Driva**
- Stuorámus jávri **Eikedalsvatnet**
- Olmmošlohku (2013) **260 990**
- Gielddaid/suohkaniid lohku **36**
- Stuorámus gávpogat **Ålesund, Molde ja Kristiansund**
- Fylkka oaivegávpot **Molde**

- goržejogat** gorži lea johka mii šávvá ja gahčá njuolga bodnái bávtis
- viessogálvoindustrija** viessogálvvut leat omd. stuolut, beavddit ja hildut



Aurlandsfjord, Flåm

SOGN ja FJORDANE – várit ja vuonat

Sogn ja Fjordanes leat oasit Nord-fjord, Sunnfjord ja Sogn. Fylkka namma sáhtášii leat "várit ja vuonat" sivas go várit ja vuonat leat válđo **duovdagat** dáppe. Stuorra oassi fylkkas leat várit mat leat badjel 1000 mehtera bajábealde ábi. Alla várit dagahit ahte dáppe arvá ollu. Brekkes, báiki Sognas, arvá **jahkásáčcat** badjel njeallje mehtera.


- Sogn ja Fjordanes leat mánga **jiehki**.
- Jostedalajiehkki, mii lea Norgga stuoramus, leat suorranan mángga guvlui.
- Jiehkit muittuhit ahte dát guhkes vuonat oktii hábmejuvvojedje jiekŋaáiggis.
- Vuotnagáttiin leat gáržžes gáttit gosa olbmot sáhtte ássat.
- • • • • • • • • • • • • • • •
- **duovdagat** eanahámit
- **jahkásáčcat** juohke jagi oktiibuot
- **jiehki** agálaš jienja

Ealáhusat ja ássan

Ealáhusat dán fylkkas leat **guollebiebman**, turismaealáhus, eanadoallu ja mánnggalágan smávit industriija. Sogn ja Fjordane lea **elfápmo**fylka. Dáppe **buvttaduvvo** eanemusat **elrávndnji** Norgas. Alla várit addet čáhcái stuorra fámu, ja go arvá ollu dáppe, de addá dát fas ollu elfámu.

Measta juohkehaš Sogn ja Fjordanes orrot muhtin vuotnagáttis. Olbmot áasset hui **biedgguid** go buohtastahttit eará fylkkaiguin. Fylkka stuorámus gávpot lea Florø. Dát báiki, nugo ollu báikkit rit-tuin, vuodđuduvvui dalle go ledje valjis sallihat mearas. Deike maid ráhkadedje sallitoljofabrihkaid. Sogn ja Fjordanes lea váttis ráhkadir geainnuid go várit leat nu ceggosat ja vuotnagáttit nu bask-kit. Ollu johtolat dáppe manná meara mielde, ja oddasat áiggiid maiddái áim-mus. Jođánisfatnasat johtet vuonaid mielde, ja fylkkas leat njeallje smávva girdišilju.

•••••
biedgguid sierra, iešguđet guovlluin
elfápmo elektralašfápmo
buvttaduvvo ráhkaduvvo
elrávndnji elektrisitehta
guollebiebman áidon russtet mearas gos bibmet ja šaddadit guliid



Sogn ja Fjordane

- Sturrodat **18 623 km²**
- Alimus várri **Store Skagastølstind** 2406 mbá
- Stuorámus suolu **Smøla**
- Guhkimus johka **Lærdalselvi**
- Stuorámus jávri **Hornindalsvatnet** (Eurohpá čiekjaleamos jávri, 514 čieju)
- Olmmošloku (2013) **108 800**
- Gielddaid/suohkaniid lohku **26**
- Eurohpá guhkimus vuotna **Sogne-vuotna/Sognefjorden**
- Norgga stuorámus jiehkki **Jostedala-jiehkki**
- Stuorámus báiki **Florø**
- Fylkka oaiivegávpot **Leikanger**



Bergen

HORDALÁNDA – gasku Oarje-Norgga

Hordalánda lea Norgga oarjeleamos fylka ja lea guovdu Oarje-Norgga. Hordalándda sáhttá juohkit viđa oassái. Lulimusas lea Hardanger, mii lea birra Hardangervuona. Hardangerduottar-lea Norgga alimus duottar. Davábealde Hardangera lea Voss. Dát lea siseana gos lea eambbo vuovdi go eará sajiin fylkkas. Eará oasit leat riddoguovllut Sunnhordalánda, Midhordalánda ja Nordhordalánda. Hordalándda namma sáhttá boahtit dološ **olmmoščearddas** "hordar", mii mearkkaša soalddát dahje

• **sáŋgár.** Hordalánda mearkkaša dalle riika gos soalddáhat dahje sáŋgárat orro.

Eanadat

Hordalánddas leat mángaduhát sullo, čiekjalis vuonat, leagit ja ceakko várit. Ii gokkoge leat guhkit go 50 km merrii dahje vutnii. Hardangera siskkobealde lea Norgga lulimus jiehkki, Folgefonna. Oarje-Norgga ja Hordalánda lea dovddus ollu arvvi ja **goržejogaid** geažil. Jahkásáčcat arvá ja muohttá Hordalánddas viehka ollu, gitta 4000 millimehtera, mii lea 4 m.

Ealáhusat ja ássan

Sullii bealli buot olbmuin Hordalánd-das áasset Bergenis, mii lea Oarje-Norgga "oaiivegávpot". Bergen lea boares **gávpe-gávpot**. Bergen Bryggges orrot ain vie-sut dološ rikkes gávpeáiggis. Dáid vie-suid huksejedje hanseáhtat, geat ledje duiskalaš gávpealbmát.

Mánja báikki fylkkas leat dovddus in-dustriija guovllut. Stordas ráhkadit skiippaid. Mongstadas fas lea **oljoraffinerijia**, mii lea Norgga stuorámus. Dás ráhkadit oljus bensiinna. Husnesas fas geavahit elfámu ráhkadit **alumiinna**. Hordalánda lea bivnnuhis turistaguolu. Alla várit ja alla goržžit, nugo Vøring-ja Skykkjedalagoržžit geasuhiit ollugiid. **Šaddomuoraid** lieđđun Hardangeris lea dovddus miehtá Norgga.

olmmošćearddas olmmošjoavkkus, omd, romani, inuihtat

sáŋgár dearvvaslaš, searra almmái/dievdu
goržejogaid jogat mat alla leavttuin ja stuorra fámuin golget/šávvet njuolgga vulos bávttiin

gávpegávpot gávpot gosa bohte olbmot juohke guovllus ja gávppašedje ja lonuhalle gálvvuid

oljoraffinerijia russtet mii sirre vuodđoolju iešguđet temperatuvrass vai šaddá omd. vuoidanolju, bensiidna, diesel, gássa



Hordalánda

Sturrodat **15 440 km²**

Alimus várri **Hardangerjøkelen, Eidfjordas** 1863 mbá

Stuorámus suolu **Osterøy**

Guhkimus johka **Vosso**

Stuorámus jávri **Hamlagrøvatnet**

Olmmošloku (2013) **503 600**

Gielddaid/suohkaniid lohku **33**

Gávpogat **Bergen, Odda ja Stord**

Fylkka oaiivegávpot **Bergen**

Norgga stuorámus gorži **Skykkjedalsfossen, Eidsfjordas** 300 m

alumiinna geahppa, nana metálla

šaddomuoraid muorat main šaddet šattut, omd. eahppelmuorat

lieđđun go urbbiin šaddet lieđit



Jæren luondu, geadgeáiddit ja gilvvaeanan.

ROGALÁNDA - olju ja mielki

Rogalándda sáhttit juohkit njealji oassái. Lulimusas lea Dalane. Nugo namma dárogillii muitala, de leat eanadagas ollu smávva **leagážat**.

Davábealde dán lea fas Jæren. Duolba guovlu mii jáhkkimis lea Norgga riggá-seamos eanadoalloguovlu. Jæren lea juhkkon eanabihtáide **geadgeáiddiigun**. Geadgeáiddit muitalit ahte olbmot áiggiid čađa leat bargan eat-namiid. Olles Jæren lea **morenaeana**

jiekŋaággi maŋnjá. Ovdal lei lossa bargu dáid gedđgiid čorget, muhto otne geavahuvvojut mašiinnat. Giđđa boahtá árrat Jærenii, ja dat lea buorre eanadol-lui. Go jæren-boanda gilvá buđehiid, de lea dábálaččat ain buorre čuoigansiivu ollu sajiin Norggas.

Ryfylka lea dat goalmmát oassi Rogalánddas, mii lea Bokna-vuona birrasis. Njealját oassi Haugalandet lea Hauge-sundda birrasis.

Ássamat ja ealáhusat

Rogalánda gohčoduvvo oljofylkan danne go olggobéalde Rogalándda gávdne olju Davvimearabotnis. Rogalánda lea lagamusas oljoguovlluid, ja ollu oljedoaimmat jođihuvvojít dáppé. Eanaš industriija dán guovllus lea čadnon oljindustriiji ja doalaha ortnegis ja fállit dehálaš **bálvalusaid** oljofitnodagái-de. Ollu oljobargit ásset Stavangeris ja eará báikkiin fylkkas. Stavanger lea dál šaddan oktii Sandnesain, ja lea fylkka stuorámus gávpot.



"Prekestolen" (sárdnestuollu) orru dego gulašii girkui, muho nu ii leat. Prekestolen lea dovddus **várdosadji** Lysefjordenis. Prekestolenis manná bákteseaidni 600 mehtera njuolga vulos, ja dás lea erenoamáš buorre várddus vutnii ja dakko váriide.

leagážat vuomážat

geadgeáiddiiguin áiddit dahkkon gedggiin

morenaeana eana mii lei gokčon assás jihkiin ja suuttadettiin fievriddii ollu gedggiid, sáddo ja láirá dohko



Rogalánda

- Sturrodat **9 376 km²**
- Alimus várri **Vassdalsegga** 1658 mbá
- Stuorámus suolu **Karmøy**
- Guhkimus johka **Suldalslågen**
- Stuorámus jávri **Suldalsvatnet**
- Olmmošlohu (2013) **457 900**
- Gielddaid/suohkaniid lohku **26**
- Gávpogat **Stavanger ja Haugesund**
- Fylkka oaivegávpot **Stavanger**

bálvalusaid fálaldagaid, yeahki, omd. ráhkadir osiid oljobovrenmašiinnaide, divvut mašiinnaid.

várdosadji báiki dahje aláš gos sáhttá oaidnit guhkás ja viidát.

VEST-AGDER – Lulimus-Norga

Vest-Agder lea Norgga lulimus fylka. Eanadat dáppe lea smávva leagážat mat leat smávit alážiid gaskkas. Rittus leat smávva **luovttažat** ja sullot. Dáppe leat smávit báikkážat gos leat vilges málejuvvon stobožat.

Vest-Agder lea riddofylka. Rittus mannet baskkes leagit davás guvlui. Eanaš jogain geavahuvvo čáhci **elfápmobuvt-tadeapmái**. Lulágeahčen lea Norgga lulimus njárgageahči, Lindesnes.

Ássamat ja ealáhusat

Vest-Agdera gávpogat leat boares gávpe- ja mearrajohtolatgávpogat. **Hirssat** ja fiellut fievrriuvvojedje skiippaid mielde olgoriikii ja bukte **gortni** ruovttoluotta. Gávpogat leat mearragáttiin ja dain leat suoddjás hámmanat. Odne leat dát gávpogat maid dehálaš industriijagávpogat. Norgga lulimus guovlu lea dovddus buorre skálžoelliid- ja hummerbivddu geažil. Makrealla lea

Kristiansand



dovddus dáppe, muhto dán áigge gávdno makrealla davvin maid. Siseatnamis lea ollu eanadoallu ja elfápmobuvttadeapmi.

Kristiansand lea lulimus-Norgga stuorámus gávpot. Gávpoga olggobealde lea **elliidgárdi** gos leat ollu ja mánggalágan eallit, maiddái ábegáhtut. Doppe lea maid kopija Kardemomme gávpogis. Geassit lea vejolašvuhta deaivvadit buot ássiiguin Kardemomme gávpogis. Elliidgárddis lea maid dovddus Kaptein Sabeltann.



luovttažat gohpážat
elfápmobuvttadeapmái ráhkadir elektrisi-tehta
hirssat dimbarat, čuhppon beahce- ja guos-samuorat



Vest-Agder

- Sturrodat **7 276 km²**
- Alimus várri **Urdalsnuten** **1437 mbá**
- Stuorámus suolu **Hidra**
- Guhkimus johka **Sira**
- Stuorámus jávri **Sirdalsvatnet**
- Olmmošlohku (2013) **177 900**
- Gielddaid/suohkaniid lohku **15**
- Gávpogat **Kristiansand, Mandal ja Vennesla**
- Fylkka oaivegávpot **Kristiansand**

- **gortni** gortnis oažžu jáffuid mainna sáhttá láibut láibbi
- **elliidgárdi** gárdi gos ollu eallit ellet áidiid duohken ja bibmojít olbmuiguin



AUST-AGDER – geasseturisttat

Agder namma sáhttá mearkkašit "eana mii merrii gállá", ja dát sáhttá heivet Agder fylkkaide. Dát eana čugge ge nju-nis Davvimerrii ja lea ge Norgga lulimus oassi. Aust-Agdera fylkkavearjus leat fis-kes holggat rukses vuodus. Dát muittuha maid fiellut leat mearkkašan fylkii.

Mearas várrái

Aust-Agder lea seaggi ja vatná mearas guhkás alla váriide. Lea dábálaš juoh-

- kit Aust-Agdera golmma oassái: riddoguovlu, vuovdeguovlu ja Setesdal. Dán leagi mielde golgá Otrajohka, ja mángga saji ávkkástallet čázi **elfápmobuvttadeapmái**. Setesdalas lea Evje, mii lea dovddus, hárves **geadgešlájaid** dah-je **minerálaid** hárrái. Dás lahka sáhttit galledit minerálapárkka. Evjes sáhtát oastit iešguđetlágan hárves minerálaid. Minerálat leat nu hárvát ahte olbmot suoládit daid.

Ássan ja ealáhusat


Eatnašat ásset rittus dahje Setesdalas. Riddogávpogat leat boares hirsa/dimbbar- ja **gávpegávpogat**. Odne lea turista-ealáhus okta deháleamos ealáhusain fylkkas. Leat liegga geasit mat geasuhit turisttaid smávva sulluide olggobealde rittu. Dáppe leat duháhiid mielde geasse**barttat**. Vel eambbosat galledit dáid smávva sulluid fatnasiiguin geassebotta.

Eanadoalus lea sávzadoallu dehálaš, ja Valle lea stuorámus sávzagielda. Valles lea maiddái Norgga boarráseamos hirsavisti/dimbbarviessu. Dát lea Repstad dálus, ja lea badjel 650 lagi boaris.



elfápmobuvttadeapmái ráhkadit elektrisi-tehta

geađgešlájaid iešguđetlágan geađgesorttat **minerálaid** muhtin ávdnasat mat gávdno-jit iešguđet báktešlájain, omd. čáhci, kvarts, riebansilba



Aust-Agder

Sturrodat **9 158 km²**

Alimus várri **Sæbyggjenuten** **1507 mbá**

Stuorámus suolu **Tromøya**

Guhkimus johka **Otra**

Stuorámus jávri **Bylandsfjord**

Olmmošloku 2013 **113 500**

Gielddaid/suohkaniid lohku **15**

Gávpogat **Arendal, Grimstad ja Lil-lesand**

Fylkka oaiivegávpot **Arendal**

gávpegávpogat gávpogat gos dáhpáhu-vai gálvovuovdin ja -oastin

barttat hyhtát



TELEMÁRKU – dáppe leat buot

Telemárku álgá rittus ja manná siseatnammá gitta Hardangerduoddarii. Go mii mátkkoštit fylkkas sisa guvlui, de šadet alážat alibun, leagit baskkibun ja vuovddit seavdnjadin, ja loahpas deavat mii duoddara, Hardangerduoddara. Ollugat lohket ahte Telemárku lea unna Norggaš. Maid dát mearkkaša? Sáhttágo mearkkašit ahte mii gávdnat dan

seammá Telemárkkus maid muđuid gávdnat Norggas? Juo, muhtimat oaivvildit dan.

Namma Telemárku sáhttá boahtit sánis "mark", mii mearkkaša vuovdi, ja olbmonamas Tel.




Rjukangorži

Ássan ja ealáhusat

Telemárkkus lea ollu **industriija**. Okta Norgga stuorámus fitnodagain, Norsk Hydro, álggahuvvui čuohte jagi áigi Rjukangorži gáttis. Goržzis ávkkástalle čáhcefámu ráhkadit goanstagilvagiid, muhto dál lea dát fabrihkka heittihuvvon. El-fápmu Rjukangoržis ja eará goržziin mannet dál **jođđasiid** mielde Hydro fabrihkaide Porsgrunnii ja eará báikkiide.

Odne orrot eanaš olbmot lahka rittu. Muhto siseatnamis leat maid ollu gelddolaš turistabáikkit.



Telemárku

- Sturrodat **15 299 km²**
- Alimus várri **Gaustadtopenn** 1882 mbá
- Stuorámus suolu **Skåtøy**
- Guhkimus johka **Skiensvassdraget**
- Stuorámus jávri **Møsvatn**
- Olmmošloku (2013) **171 330**
- Gielldaid/suohkaniid lohku **18**
- Stuorra báikkit **Skien, Porsgrunn, Langesund ja Notodden**
- Fylkka oaiivegávpot **Skien**

- industriija** fabrihkat ja gálvo-buvttadeapmi
- jođđasiid** assás ledningaid



Hávdi gosa vikingagonagasat leat hávdáuvvon oktan
skiippain jagiid 4–500 m. Kr. Larvik, Vestfold.

VESTFOLD – hávdečorut

Vestfold lea smávva fylkkaš oarjjabealde Oslovuona. Ovdal lei Oslovuona namma Folden, ja go dát lea oarjjabealde vuona, de šattai namma Vestfold. Dolin ásse vikingagonagasat dán guovllus. Ynglesohka, mas Harald Hårfagre bodii, ásse dáppe. Eai gosge Norggas gávdno ná ollu gonagasláš **hávdečorut** go dáppe.

Vestfoldas leat badjel viðátoassi eana-dalloeatnamat. Badjel bealli fas lea vuovdi.

Vestfolda čađa manná guhkes **morena** mii lea jiekŋaágge bázahus. Dan gohčodit namain Raet. Ollu sajiid maná riikkageaidnu dán mielde. Muhtumat gohčodit dán geainnu Raet-geaidnun. Raet sáhttit oaidnit maiddái nuppe bealde vuona Østfoldas.


hávdečorut hávdealážat

morena eana mii lei gokçon assás jihkiin mii suuttadettiin fievríridii ollu gedđgiid, sáddo ja láirá dohko.

Ássan ja ealáhusat

Vestfoldas gávdnojit ollu **duktásajit**. Ollu hávdečorut vikingaágigge rájes gávdnojit miehtá fylkka, ja muhtimiid leat rahpan. Oseberg fanas ja Gokstad fanas vikingaágiggis gávdnojedje dalle dákkár čoruin. Dát fatnasat leat dál Vikingafanasmuseas Bygdøyas Oslos. Vaikke Vestfold lea Norgga nubbin unnimus fylka, de liikká orrot ollu olbmot dáppe. Gávpogat leat manjálagaid mearragátti.

Vestfoldas lea buorre eanadoalloeana. Danne sáhttá dáppe gilvit ja šaddadit ollu ruotnasiid ja gilvvarásiid. Vuovdeoallu lea maid dehálaš ealáhus Vestfoldas. Mearrajohtalus lea leamaš álo dehálaš eallingeaidnu. Maiddái **fáles**-bivdu lei dehálaš ovdal.



Vestfold

- Sturrodat **2 224 km²**
- Alimus várri **Skibergfjell** 632 mbá
- Stuorámus suolu **Nøtterøy**
- Guhkimus johka **Numedalslågen**
- Stuorámus jávri **Farrisjávri**
- Olmmošlohku (2013) **240 400**
- Gielddaid/suohkaniid lohku **14**
- Stuorra gávpogat **Tønsberg, Sandefjord, Larvik ja Horten**
- Fylkka oaivegávpot **Tønsberg**

duktásajit eana gos vuhtto ahte olbmot leat ássan

fáles stuorámus mearraeallit

Jagi 1904 fuomášuvvui vikingaskiipa Oseberggas, Vestfoldas. Dat lei orron láiráeatnamis ja danne bures seilon.



BUSKERUD – silbaruvkket

Fylka lea ožzon nama boares Biskupsrud dálus Modum gielddas/suohkanis. Dása huksii bispa dálu. Otne lea fylcka sturrodat siseatnama duoddariin gitta Oslovutnii. Buskerudas leat guhkes šávvi jogat, duoddarat, leagit ja viidis vuovddit. Lullin fylkkas leat buorit eanadoalloeatnamat. Fylka stuorra jávrriin lea buorre **reabbábivdu**.

Ássan ja ealáhusat

Eanaš Buskeruda ássit orrot legiin ja fylkka lullinuortta guovllus. Turista-áigodagas manná ruvketoga dološ silbaruvkiide.

silbaruvkket báiki luonddus gos sáhttá viežzat silbba

reabbá skálžoealli, dan lea njálgga borrat

Drammen lea stuorámus gávpot. Odne lea Drammen eanemus dovddus oððabiilla hámmanin. Deike bohtet stuorra fatnasat biillaiguin Duiskkas, Englánddas, USA:s, Japánas ja Koreas. Hámmanis leat buotlágan biillat mat fievrriuvvojít biilagávppiide miehtá Norgga.

Buskeruda legiin leat čierastanluohkát, nugo dovddus báikkit Geilo ja Hemse-dal. Ollu jogaid leat buðdon vai sáhttet buvttadit **elfámu**. Vuvddiin geasehuv-vojít **vuodðoávdnasat** saháide. Norgga stuorámus muorraávnnasfabrihkka lei Hurumis, muhto heaitihuvvui lagi 2013.



Dološ silbaruvkkiin buvttadedje silbba, lájo ja veaikki 1700-logus.



Buskerud

- Sturrodat **14 910 km²**
 - Alimus várri **Folarskarvnuten**
 - 1933 mbá
 - Stuorámus suolu **Gråøya**
 - Guhkimus johka **Drammensvassdra-get**
 - Stuorámus jávri **Tyrfjorden**
 - Olmmošloku (2013) **271 252**
 - Gielddaid/suohkaniid lohku **21**
 - Stuorra gávpogat **Drammen, Kongsb erg ja Hønefoss**
 - Fylkka oavegávpot **Drammen**
-
- elfámu** elektrisitehta
 - vuodðoávdnasat** ávnnas maid viežzá luonddus ja das fas ráhkada eará ja oðða ávdnasiid dahje borramuša, dás: muorat

OPPLÁNDA – guovdu Lulli-Norgga

Opplánda lea okta Norgga stuorámus fylkkain. Dáppe leat viiddis duoddarat gos gávdnojít eanemus ja alimus várit Norggas. Ii ovttage eará fylkkas leat nu ollu rájit eará fylkkaide go Opplánddas, namalassii čieža.

Stuorra várreguovllut ja leagit

Fylkka davimusas leat stuorra várre-guovllut nugo Jotunheimen, Dovrefjell

ja Rondane. Opplánnda várreguovllut leat bivnnuhat, ja Besseggen Jotunheimenis lea bivnnuheamos. Dát lea baskkes várrečielgi gaskal guovtti jávrri. Jus mátkkoštat Opplánddas, de jodát jáhkrimis dán stuorra ja viiddis leagi mielde, namalassii Gudbrandsdalen.

Besseggen.



Ássamat ja ealáhusat

Olbmot Opplánddas orrot legiin ja duolba eatnamiin lullin fylkkas. Sii geat várreguovlluin ásset, barget eatnašat turismmain. Opplánddas barget eatnašat eanadoaluin ja vuovdebarguin. Ollugat barget šibihiiguin nugo **bahčegusaiguin**, sávzzaiguin ja gáiccaiguin.

Fylkka jogat addet ollu **elfámu**. Vulos guvlui legiin leat **elfápmorusttegat**.



Muskus orru Opplándda duoddariin.



Opplánda

- Sturrodat **25 189 km²**
- Alimus várri **Galdhøpiggen**
2469 mbá
- Guhkimus johka **Drammensvassdraget**
- Stuorámus jávri **Randsfjorden**
- Olmmošloku (2013) **187 750**
- Gielddaid/suohkaniid lohku **26**
- Stuorra gávpogat **Lillehammer** ja **Gjøvik**
- Fylkka oaivegávpot **Lillehammer**

- bahčegusaiguin** bohčegusaiguin
- elfámu** elektrisitehta
- elfápmorusttegat** rusttegat mat ráhkadit elektrisitehta



Miessemearkun Svhken sijtes, Hedmárkkus.

HEDMÁRKU – šuvvi vuovddit

Hedmárku lea maiddái **siseanafylka**. Dáppe leat liegga geasit ja galbma dálvvit. Østerdalen manná čađa fylkka davvin Tynsetas gitta Kongsvingerii lullin. Dán leagi mielde golgá Glomma, mii lea Norgga guhkimus johka. Hedmárku lea Lulli-Norgga stuorámus fylka. Das lea guhkes rádji Rutti ja muđuid golmma eará fylkii.

- Davvin fylkkas lea stuorra **ávži** mas leat ceakko seainnit. Dát orru dego livččii čuolastuvvon, ja danne lea ožzon nama Jutulhogget. Jähkkimis šattai dát jiekŋjaáiggis go ollu čáhci borai ávžzi.
- •
- **siseanafylka** fylka mas ii leat riddu/mearragáddi
- **ávži** luddestat bávttis, gokko bákti lea juhkkon čazi ja jieknajohtima/fierrama geažil


Ássamat ja ealáhusat

Hedmárkkus ásset eanemusat olbmot **duolbaeatnamiin** birra Mjøsa, Hamaris ja dan birrasiin. Muđuid ásset olbmot Glomma gáttiin ja smávit báikkiin. Trysil lea dovddus dálvevaláštallanbáiki.

Hedmárku lea Norgga stuorámus eana-dallo- ja vuovdedoallofylka. Eatnamat birra Mjøsa leat buorit eanadoalloguovl-lut. Vuovdebargu lea deháleamos ealáhus.

Hedmárku lea sámi lulumus guovlu, ja Hedmárku ja Opplándda rádjeguovl-luin lea ealli ja doaibmi sámi boazo-doallu.

•••••
duolbaeatnamiin eana mii lea duolbbas, das eai leat várit ja alla bávttit



Hedmárku

- Sturrodat **27 397 km²**
- Alimus várri **Rundeslottet 2178 mbá**
- Guhkimus johka **Glomma** (Norgga guhkimus johka)
- Stuorámus jávri **Mjøsa** (Norgga stuorámus jávri)
- Olmmošlohu (2013) **194 236**
- Gielldaid/suohkaniid lohku **22**
- Stuorra gávpogat **Hamar, Kongsvinger ja Eidsvoll**
- Fylkka oaiivegávpot **Hamar**

Elgåas lea sámi skuvla mii leamaš mielde váikkuheamen dasa ahte ollu nuorat ja mánát leat lullisámegiela oahepan hállat, lohkat ja čállit.



Norgga váldogirdišillju, Gardermoen, lea Akershusas.

AKERSHUS - Gardermoen

Akershus fylka lea lahka oaivegávpoga. Oslo muhtin láhkai juohká Akershusa guovtti oassái. Dat guokte stuorámus gielddaa/suohkana, Asker ja Bærum, lea- ba olggobealde ja oarjjabealde Oslo. Romerike lea nuorttabealde ja davá- bealde. Guovlu lulábealde Oslo gohčo- duvvo namain Follo.

Eanadat


Akershusas leat stuorra, šattolaš eana- doalloeanadagat ja vuovdeeeanadagat.



Ealáhusat ja johtolagat

Olbmot barget eanadoaluin ja vuovde-bargguin, muhto ollugat barget maiddái buvddain ja kantuvarrain. Ollugat barget Oslos. Mángga gielddas/suohkanis leat maiddái fitnodagat mat buvttadit gálv-vuid. Nittedalas lea dovddus jiekna-lákcafabrihkka Diplom-is ja Ringnes bryggeri mii buvttada bruvssa ja vuola/vuollaga.

Fylkka čađa mannet stuorra geainnut ja ruovdemáđit Osloi. Stuorra válđo-geainnut E6 ja E18 rasstildit Oslo, muh-to mannet vuos álggus Akershus čađa. Juohke beaivve fievrriida NSB logiid duháhiid mielde olbmuid badjel fylkka-rájiid gaskal Oslo ja Akershusa.



Akershus

- Sturrodat **4 918 km²**
- Alimus várri **Fjellsjøkampen 812 mbá**
- Guhkimus johka **Glomma** (Norgga guhkimus johka)
- Stuorámus jávri **Øyern**
- Olmmošloku (2013) **573 300**
- Gielddaid/suohkaniid lohku **22**
- Stuorra gávpogat **Lillestrøm, Ski ja Drøbak**
- Fylkka oaivegávpot **Oslo**

ruovdemáđit toga johtá ruovde-máđiid mielde, toga johtolat



Østfold

ØSTFOLD – válodgeaidnu Rutti

Østfold lea okta Norgga unnimus fylkain. Dás lea čielgi Ruota vuostá ja ámadadju Oslovutnii, lohket sii geat dáppe **orrot**.

Čielga jiekŋaáiigge eanadat

Østfold lea oalle duolbbas. Alimus aláš lea dušše badjelaš 300 mehter bajábealde ábi. Jiekŋaáiigge maŋŋá lei eanaš oassi fylkkas čázi vuolde. Dan sivas lea measta buot eana boares mearabodni.

Dás lea ollu láirá, mii lea buorre eana-dalloeana. Guosat liikojit dákkár eat-namii. Østfold rittus lea Hvaler. Go dáid sulložiid geahčá Oslovuonas, de sulastahttet dát fállái mat vudjet lulás. Sullot ožžo hámi jiekŋaáiggis. Jiekŋa skuvrii **lássáid** guhkédáleš hápmin.

.....

orrot ásset

lássáid unna sulložiid, báktesulluid, čázevuole sulluid

Ealáhusat ja ássamat

Moss, Halden, Sarpsborg ja Fredrikstad gávpogat leat rittus. Dát vuodđuduuvvo-jedje dan sivas go ledje **joganjálmmiin**. **Hirssaid** fievrriedej jogaid mielde, ja dás sahájedje **čáhcefámuin** muoraid ávnnasin, maid málbmái vuvde. Sarpsborgga goržzi lahka leat mánga **industriijafitnodaga**. Stuorámus ja eanemus dovddus lea Borregaard. Sii buvttadit iešguđet lágan **sellulosa buktagiid**.

Østfoldas leat ollu stuorra eanaoamas-teaddjit ja gárdimat, ja gohčoduvvo ge **gárdinfylkan**. Østfoldas lea rádji Rutti. Hvalerii bohtet juohke geasi ollu turisttat.




Hvaler

joganjálmmiin gokko jogat golget merrii

hirssaid dimbariid

čáhcefámuin čáhcejohtu attii energija sahái, vai dat sáhtii sahát

industriijafitnodaga fitnodagat mat buvttadit iešguđetlágan buktagiid/ávdnasiid



Østfold

Sturrodat **4 182 km²**

Alimus várrí **Slavasshøgda Rømskogas** **336 mbá**

Guhkimus johka **Glomma (Norgga guhkimus johka)**

Stuorámus jávri **Vannsjø**

Olmmošlohku (2013) **284 500**

Gielldaid/suohkaniid lohku **18**

Stuorra gávpogat **Fredrikstad, Sarpsborg, Moss, Halden**

Fylkka oaivegávpot **Sarpsborg**

sellulosa ávnnas mii buvttaduvvo muoras. Das sáhttá ráhkadit omd. báhpira, muho maiddái suohkadin dahkat bátnegealana ja sáibbu.

buktagiid ávdnasiid



Oslo ráððeviessu.

OSLO – Norgga oaivegávpot

Oslo lea Norgga stuorámus gávpot ja seammás lea sihke fylka, gielda ja oaivegávpot. Dieðuid vuolde oainnát ahte gávpogis eai leat guhkes jogat dahje stuorra jávrrit, ja eai ge alla várit. Gávpot lea Norgga unnimus fylka **viidodaga** dáfus. Norgga nubbin unnimus fylka, Vestfold, lea viða geardde stuorát.

Oslo lea oaivegávpot dan sivas go dáppe lea ráððehus ja Norgga Stuorradigi, ja maiddái go dáppe orru gonagas.

Stuorradigi ja ráððehus stivrejít Norgga dáppe.

Lokaliseren ja ealáhusat

Lea álki áddet ahte dákko šattai gávpot. Gávpealmát sáhtte deaivvadit ollu-giiguin geat áigo gávppašit. Seammás lea dás álki olahit eará báikkiide Lulli-Norggas dahje Eurohpá riikkaide. Ollugat ásaiduvve deike gávppašeami dihte dan sivas go gávppašeaddjít álkit ola-hedje deike iežaset gálvvuiguin.

Eanaš gávpotássit ásset vuona lahko-
siin. Davábealde gávpotguovddáža
lea dovddus mátkeguovlu Nordmar-
ka, gos leat dušše moadde ássi. Gávpot-
oasit ožžo nama dan mielde makkár
industriija doppe lei. Sagene oaččui
namas das go doppe ledje ollu sahá-
rusttegat. Odne leat Oslos eanemusat
kantuvrrat ja **gávppit**. Earret eará leat
ollu stuorra industriijafitnодagain kan-
tuvrrat Oslos. Norgga stuorámus uni-
versitehta ja allaskuvla lea dáppe.

Mánggakultuvrralaš gávpot

Mii dadjat Oslo lea Norgga stuorá-
mus mánggakultuvrralaš gávpot. Ollu
olgoriikkalaččat leat deike fárren, ja
sii orrot dávjá sierra guovlluin gávpo-
gis. Go dáid osiin váccašat, de meas-
ta oaččut dakkár dovddu don leat eará
sajis máilmis go Oslos. Guovttis
logi olbmos Oslos bohtet eará riikkas
go Norggas. Oslos orrot maiddái ollu
sápmelaččat ja dan sivas mángji dad-
djo ahte Oslo lea sámi stuorámus báiki.
Dáppe lea sámemánáidgárdi, ja lea
maiddái sámegieloahpahus skuvllas.

viidotaga areála

industriija buvttadeapmi

gávppit buvddat, rámbuvrrat



Govvalista

Anti, Åsá-Márgget: s. 108, 115 v
Baard Bratås/Grimstad Adressetidene: s. 44 bg
Bertelsen, Ørjan: s. 10, 119
blogg.no: s. 59 b
ČálliidLágádus: s. 60 v, 75, 98
cdon.com: s. 59 v
Colorbox: s. 44 v
Deanu kulturskuvla: s. 27 v
Facebook: s. 58 o
Fjellheim, Elin: s. 147
Garmin: s. 99 gs
google.no/maps: s. 104
Guttorm Einarsen, Aina Helene: s. 17
Guttorm Einarsen, Heidi: s. 45 b, 76 b, 77v
Helgeland, Charlotte (sárgun): s. 13, 35, 86, 87, 97
Hjortfors, Lise Mari NPK s. 23
Hætta Isaksen, Britt Elin: s. 62
Hætta Isaksen, Ella Marie: s. 36
Innovation Norway: s. 109 v Pål Bugge, s. 117 v Siv Nærø, s. 120, 127 v, 142 Pål Bugge
Johnskareng, Amund: s. 50
Kart og Grafikk/Kielland: s. 105, 111, 117, 119, 121, 123, 125, 127, 129, 131, 133, 135, 137, 139, 141, 143, 145, 147, 149, 151, 153
Kåven Kaaby, Karina (illustrašuvdna): s. 79 g
Mortensson, Maths: s. 146
Myhre, Kai: s. 22
Mäkiaho, Jari-Pekka: s. 74 g
Nesje, Atle: s. 74 o
ngu.no s. 73
Nordsletta, Svein: s. 90, 92, 93 o, 108, 122
Norgeskart.no: s. 85g
NRK Sámeradio: s. 46 Mette Ballovara, s. 84
Norske nationaldragter: s. 20
Olsen, Jan Helmer: s. 82–83, 85 o, 114 www.LuftFotoFinnmark.com
Olssrud, Leif (sárgun): s. 11
Panoramio: s. 115, s. 25 Harry Wahlvåg
Puschman, Oskar: s. 148 v
Samfoto: s. 19 Roger Hardy, s. 26 Espen Bratlie, s. 40 Kjerstin

Mertens, s. 140 Øystein Søbye

Sammallahti, Pekka: s. 70-71
Sarre, Hilly: s. 27b

Scannpix: s. 12 Heidi Voss-Nilsen, s. 25 Tom Schandy, s. 32 Arash A Nejad, s. 38 Lars Magne Hovden, s. 39 Erlend Aas, s. 42/43 Bjørn Erik Rygg, s. 44 o Hugo Bergsaker, s. 143, s. 153 Trond Søraas

Schandy, Tom: s. 132
Shutterstock: s. 6, 14, 16, 18, 37, 43, 45 v, 51, 56, 57, 58 g, 72, 78 gs, 79 b ja v, 80, 89, 99 v

Skuvlla kártagirji, Suoma Sámediggi: s. 102-103

Solbakki, Mihkku: s. 8, 24 b, 47, 49, 52

Sparebank 1 s. 60 b

Statens Kartverk: s. 88, 95

Statoil/Harald Pettersen: s. 117

Studio Borga: 24 v, 28, 29, 42, 78 b ja v, 91, 93 b,g, 94; Minna Saastamoinen, s. 66–67; Esa Karpoff

Topfoto: s. 141

Utsi, Carl-Johan: s. 21

VG: s. 38 v Hugo Bergsaker, s. 148 b Jan Øyvind

Wikimedia: s. 76 v, 77 b, 99 b, 118, 122, 124, 134, 135, 137 Frode Inge Helland, 139, 149

Wikipedia: s. 79 gs Karl Ragnar Gjertsen, s. 100–101

Visitnorway.com: s. 68 Terje Borud, 109 v Terje Rakke/Nordic Life, 110 Nancy Bundt (Oslo), Terje Borud (Møre ja Romsdal), 125, 126 Per Eide, 128 Frithjof Fure, 130 Sónia Arrepia Photography, 133 Casper Tybjerg, 136 Kurt Hamann, 138 CH, 144 Chris Arnesen, 145 Asgeir Helgestad/Artic Light AS, 150–151 Terje Rakke/Nordic Life, 152 Nancy Bundt

Teavsttat

Broch Johansen, Siri s. 35

Guldal Garjá – Hear the Raven. Ken Jackson DAT. 1992. Dikta girjjis s. 7

Guttorm Einarsen, Heidi s. 27, 44, s. 62–63 (red)

Nordsletta, Svein: s. 96–97

Redd Barna/Gájo Mánáid. s. 61 .Jorgalan sámegillii: Heidi Guttorm Einarsen

Valkeapää, Nils-Aslak. Beaivi Áhčážan. Dat 1988. s 67

ČálliidLágádus ii leat lihkostuvvan buot goffa-oamas-teddjiin oažžut oktavuoða. Jos dán girjjis fuomášat gova maid don oamastat, de áinnas váldde minguin oktavuoða. Mii máksit dábalaš govvahonorára gova ovddas.

Mii dáppe lea servodatmáhttu ja geografija oahppogirji 5.–7. ceahki ohppiide.

Servodatmáhttu ja geografija lea oahppu dan servodaga birra ja eatnandiehtu máilmimi ja daid guovlluid birra gos mii eallit ja doaibmat. Oahppogirji lea juhkkon guovtti oassái. Vuosttaš oassi lea servodatmáhttu, ja nubbi oassi lea geografija. Govat ja illustrašuvnnat dorjot oahppogirjeteavstta. Amas sánit leat merkejuvvon sierra ivnniin ja čilgejuvvon ravddas. Juohke oassái lea loahpas čoahkkáigeassu dahje fáktastobe. Bargobihtát leat sihke oza-ja-gávnna-vástádusa hámi mielde, ja dahkama ja dutkama várás.

- **Mii dáppe 1** lea vuosttaš girji servodatmáhttu ja geografija oahppogirjeráiddus. Oahppogirji lea čállon jagi 2013 servodatfágaplána rievda-dusaid mielde, ja gokčá dan máhttoulbmiliid.
- Eará girjjit dán ráiddus leat: **Mii dáppe 2 ja Mii dáppe 3**. Oahpaheaddjiráva, bláđengirji ja lassi bargobihtát: calliidlagadus.org/sf

ISBN 978-82-8263-163-1



9 788282 631631

ČálliidLágádus

